

四庫全書

史部

欽定四庫全書

史部

江南通志卷十七

詳校官給事中<sub>臣</sub>丁雲錦

檢討<sub>臣</sub>德生覆助

總校官編修<sub>臣</sub>王燕楮

提調官中書<sub>臣</sub>葉 炎

膳錄監生<sub>臣</sub>江 晉

欽定四庫全書

江南通志卷十七

輿地志

山川

七

太虛鳳三府

太平府

青山在府東南三十里綿亘甚遠府志云晉桓溫與袁宏遊青山共載而歸即此齊謝朓築室山南故又名謝公山峰巒層疊有林壑泉石之勝宋米

帝書第一山碑在山麓

尼山在府東南四里一名尼坡山麓舊有古梅數十本寒香沁人彷彿羅浮鄧尉又名梅山宋鄭羽建百花頭上亭虛鉞為之記

九井山在府南十里山有九井今竭其五世傳桓溫所鑿元和志云殷仲文九日從桓元登九井賦詩即此

龍山在府南十里怪石磊砢蜿蜒如龍因名孟嘉



九日登高落帽即其處縣志云輿圖考謂屬江陵  
龍山非是按溫鎮武昌非江陵也武昌無龍山溫  
時為鎮將豈得適千里遊山乎又考陶靖節集孟  
嘉傳云嘉令巴丘入官從事中郎遷長史在朝隤  
然正順而已每會神情獨得超然命駕徑之龍山  
顧影酣宴造夕乃還若江陵龍山距朝三十餘里  
何能趣命駕而竟夕返乎其為當塗龍山灼然矣  
郡志云桓溫嘗以重九日與僚佐登此疑必溫移

鎮姑孰時事也

博望山在府西南三十里亦曰東梁山與江西岸  
和州之梁山對峙如門故亦名天門山卧江中遠  
望如積黛故又名峨眉山春秋時楚獲吳餘艘於  
此宋孝武閱水軍有雙爵集繖蓋因立雙闕於博  
望

褐山在府西南三十五里臨大江五代用兵處宋  
史云紹興二年命沿江置烽火臺於當塗之褐山

即此也

金柱山在府西三里宣歙諸水由姑孰入江奔瀉  
於此明萬厯間民掘地得金邑令章嘉貞請於郡  
守割千金建塔其上以鎮之初名鐵淋壁以西方  
屬金故名金柱

黃山在府西北五里山形如初月傳有浮丘舊跡  
又名浮丘山上有宋孝武離宮今存凌歊臺遺址  
許渾詩云三千歌舞宿層臺是其處也

采石山在府西北二十五里昔人采五色石於此  
因名一名翠螺山後漢丹陽疆域志云西臨大江  
為吳楚險要晉王渾駐師取吳隋韓擒虎宵濟破  
陳宋曹彬渡江取南唐明常遇春先登獲捷皆在  
此山南有磯峭拔險峻亦曰牛渚舊傳金牛出此  
故名輿地志云溫嶠平蘓峻亂至牛渚磯以下多  
怪物燃犀照之奇形異狀畢見南趾有燃犀亭在  
其上李白騎鯨亦在此故謫仙樓捉月亭皆在焉

梁元帝玄圃牛渚磯碑

竊以增城九重仙林八樹未有船如駕鶴時度

安妃橋如牽牛能分織女丹鳳為羣紫柱成列清風韻響即代仙歌桂影浮池仍為月浦壁月朝暉金樓啓扉盡船向浦錦纜牽磯花飛拂袖倚香入夜山林朝市併覺忘歸

磨盤山去郡二十里晉書云鎮西將軍謝尚守采石駐兵於此其地即將臺

葛陽山在郡治北四十里上有羊耳洞藤蘿隱蔽洞前方石相傳為葛仙翁棋局東上有八仙臺潘母床相傳潘母亦仙去山勢環抱最為幽勝

鸚鵡山在郡城北與葛陽山相連山有鸚鵡石雌雄各一每遇雷雨鸚鵡子從石中迸出圓潤如卵土人得之以治疾有石嵌空側出如半帆長丈餘俗呼為船尖峰東壁諸壑環拱揖如欲來船者亦一奇也

望夫山在府西北四十里山高百丈正對和州城樓九域志云昔人適楚不還妻登此山望之乃化為石

寶積山在府北二十里舊傳山產青綠因名宋孫  
仙姑跨鶴飛昇於此今丹池及石刻猶存

白壁山在府北二十五里濱江三峰拔起如聖一  
名石壁俗名龜山李白與崔宗之乘舟月夜自金  
陵溯流過此玩月白衣宮錦袍坐舟中旁若無人  
有秋月照白壁皓若陰山雪之句

慈姥山在府北四十里昔楚僧真定見磯頭浪湧  
以杖錫開河於磯後水分舟便故又名和尚港山

南峭壁臨江產圓竹聲中音律可為簫管相傳馬  
融所賦洞簫即此山竹也上有丁蘭祠

赤金山在府東北十五里舊出銅類金淮南子食  
貨志所謂丹陽銅也今不產

藏雲山一名神武山在府東北二十五里山高且  
深可藏雲遂名中峰峭立百丈左為致雨峰雲起  
即雨禱輒應

翰壁山在府東北四十里梁武帝起居注云大同



九年鴻臚表往姑孰翰壁山采石墨即此

橫望山在府東北六十里連亘三邑丹陽湖在其  
南左傳云楚子重伐吳至衡山即此按衡與橫通  
杜預注謂四望皆橫因名橫望陶弘景嘗隱此構  
讀書堂下為澄心寺關公廟廟前峭壁參天老松  
倒垂長百尺最高處有王磐題壁立萬仞四字亦  
奇觀也

凌家山在府東三里有石洞傳是陳羅二仙隱處

上有凌雲塔又名凌雲山山南麓瀕姑溪去岸十餘丈為釣魚臺傳為李之儀釣魚處

月盤山在府東四里一名景山有洞一亭六湖山烟雨亭其最也登其巔溪山秀列如在几筵遊者謂不讓吳下虎邱白門雨花云

白紵山在府東郡志云本名楚山晉桓溫遊此歌白紵因改今名宋秀武曾遊幸至此山巔有大夫松舊稱白紵松風為一郡名勝

晉山在府東十五里一名甌山壁立百仞有龍窟  
歲旱人焚此窟以起龍多得雨

石城山在府東二十里有石環繞如城唐羅泰記  
云有八角井飲馬池駕鼓臺在焉舊傳楚熊繹受  
封於此

白土山在府東二十五里土可陶可埴東與青山  
連

靈墟山在府東三十五里舊傳丁令威化鶴於此

卷之五  
壇址猶存有丹洞丹井

龍泉山在府東三十五里勢如飛龍有福源寺在其脊有泉傳羅浮異僧卓錫所開汲以竹則清以綆則苴濁不可食傳寺初建材木自井中出

赭山在蕪湖縣西北五里江南地理志云赭山丹赤故郡名丹陽山有塢塢後滴翠軒是黃庭堅讀書處

范蘿山在蕪湖縣西北五里下臨大江烟波一望

無際

七磯山在蕪湖縣西北十五里南史云周文育襲彭城徐嗣徽引齊人渡江據蕪湖列艦於青墩至七磯以斷文育歸路即此一名磧磯

靈山一名戰馬山在蕪湖縣西南五里大江中隋唐建靈山寺於此

礮磯山在蕪湖縣西南七里大江中蟪老蛟也磯有石穴廣一丈深不可測圖經云寧淵廟舊在其

上明建靈澤夫人祠世傳蜀先主妃即孫權妹歸  
吳聞先主崩哀殯葬此磯在北岸原隸濡須登磯  
止見蕪湖故明高啟有噪磯烟鎖在蕪湖之句

白馬山在蕪湖縣西南二十五里有紫燕洞冬時  
紫燕來蟄春則去山脊峰迴石聳有洞深廣莫測  
夙多仙跡世稱為福地洞天焉

荆山在蕪湖縣東十六里荆沼之水出焉西接小  
荆山有鶴跡龜文之石九域志謂卞和得玉處

非是

赤鑄山在蕪湖縣東北八里圖經云楚干將造劍之所今山有干將臺相連有神山是其淬劍處上有磨劍石并池

浮丘山一名隱玉山在繁昌縣東十里府志云有浮丘洞及龍池鎖虎石丹井相傳浮丘公王郭二仙隱此產茶甚佳

隱靜山在繁昌縣東南三十里五峰環會泉石甚

勝有寺前雙松傳為杯渡禪師手植

金峨山在繁昌縣南一里迤南有金峨洞一竅通  
人行石枰在馬山下即峨溪匹練處

磕山在繁昌縣南十里有龍池長流不竭有龍  
堂禱雨輒應一名蜃居山

馬仁山在繁昌縣南三十里以上類人馬狀舊名  
馬人唐德宗時石馬鳴殿之易今名上有五峰王  
冲霄隱此



獅子山在繁昌縣南三十里石雄踞如獅因名有峰六眠牛一峰尤奇山椒石壁數十仞松杉竹樹與碧澗紅泉相間吞吐雲霧亦奇觀也

龍華山在繁昌縣十五里有乳泉通石竇資民灌溉石上產丹桂一株近千年香襲里許邑稱龍華丹桂相近為紅花山一名荷花尖諸峰如蓮萼下有紅花澗為邑人造紙處又西五里為杏山

覆釜山在繁昌縣西北二十五里山頂如平掌上

有古廟址及井泉

公孫山在繁昌縣西北四十里世傳公孫捷所居  
有公孫橋

鳳凰山在繁昌縣西北五十里山頂有鳳池鳳穴  
下臨荻港珠金沙

大陽山在鳳凰山之北接小陽山有龍池雖旱不  
竭山之西麓盡於江曰板子磯寰宇記云一名返  
秦磯

三山在繁昌縣東北三十五里三峰秀起曰老子曰方丈曰秦望上有九蓮洞東即三山磯也

赭圻嶺在繁昌縣西三十里與覆釜脈接晉時出紫玉攻為器以獻太廟故名赭圻晉哀帝召桓溫入朝至赭圻詔止之遂築城於此

浮鳩磯在繁昌縣東北三十里老山址出江中下有湫江月映水波不能混俗名龍王磯

夏舍人山在郡治東北有夏舍人廟

大江在府西自銅陵縣界流入歷繁昌蕪湖當塗  
三縣東北流入江寧縣界

中江在蕪湖縣西南漢書地理志云中江出縣西  
南東至陽羨入海今縣河東達黃池入丹陽石臼  
等湖至銀林堰乃中江故道也蘓常承中江下流  
五堰築而中江不復東皆由縣西行以達於江

鵲江在繁昌縣北境流入蕪湖界輿地志云銅陵  
鵲頭山為鵲頭至三山為鵲尾因名鵲江繁昌諸

水注之

大信河在府西三十五里亦曰南浦自蕪湖白岸湖西北流至大信鎮會龍山港入於江

黃池河在府南七十里河中流以北屬當塗以南屬宣城今設浮航

采石新河在府西北二十五里牛渚磯東宋慶厯中以磯立江流之衝水勢湍激大為舟害乃開新河於磯後以達大江舟獲安濟

長河在蕪湖縣南半里源出廣德宣州經縣前西北流入江

青墩河在蕪湖縣南有洲曰青墩沙即周文育克徐嗣徽處

丹陽湖在府東南七十九里周三百餘里按徽州寧國池州江寧廣德諸水匯為石臼固城丹陽三湖而丹陽為最大與溧水高淳皆以中流分界實太平巨浸也

蕪湖在蕪湖縣西南源出丹陽湖過黃池合五丈湖路西湖諸水至縣入江蓄水不深而生蕪藻故名

天成湖一名天聖湖在蕪湖縣東南十四里亦丹陽湖下流所匯也廣百八十頃流入荆沿港達於長河

姑孰溪在府南二里一名姑浦合丹陽東來諸水經寶積山入於江

思賢港在府北三十五里謝朓李白崔宗之皆過  
此賦詩後人思之因名

魯港在蕪湖縣南十五里源出宣城西注大江一  
名魯明江舊志云昔有魯明仲者居此

鳩茲港在蕪湖縣東四十里入於長河或以為古  
鳩茲也左傳云楚伐吳至鳩茲杜預以為卑夷今  
作勾慈音近而字譌也

荻港在繁昌縣西南四十里水出南陵由馬仁山



西入繁昌縣界至鳳凰山下為荻港入於江與赭圻城接

慈湖水在府北六十里元和郡國志云吳將笮融屯兵於此

鼉浦在府東五里相傳昔有鼉為祟遇道者截草擲浦中害遂除

廬州府

大蜀山在府西二十里爾雅云蜀者獨也山屹然

孤特遠見二百餘里為一郡之鎮其西二十里有  
小蜀山

大瀾山在府西百里上有泉不涸其西為龍鳳山  
口東南通舒城北走壽州

雞鳴山在府西北四十里舊志云肥水所經上有  
關

紫蓬山在府西南七十里李陵廟又名李陵山  
肥水出焉有逕達府西五十里之石佛山兩旁皆

石中路通人行元末設竹林關以守隘其近者為  
馬鞍山又西三十里有蓮花山皆以形名

姥山在府東南百里巢湖中宋書云晉安王子勛  
兵攻廬江沈攸之等大破之追至姥山又孤山亦  
在巢湖中魏邢巒破梁將桓和於此一名聖女山  
上有大姥廟

龍泉山在府東五十里絕頂有泉迴繞僧寺

青陽山在府東六十里府志云元余闕讀書其上

其南為方山

四頂山在府東七十里俯瞰巢湖上有四峰特起相傳魏伯陽鍊丹之所隋地理志云襄安縣四鼎山即此相近為梅子山

小峴山在府東七十里南史云齊蕭懿屯小峴禦王肅梁韋叡侵魏拔小峴俱此又山側通金椒者為餘峴口

浮槎山在府東八十里一名浮巢山一名浮閣山

方輿勝覽云俗傳自海上浮來山頂有甘泉舊建  
道林寺相傳梁武帝女為尼於此有海榴一株所  
手植也歐陽修云山在慎縣南三十五里隋書地  
理志云有浮閣山在慎縣王禕云慎縣在廬州界

中

附

宋歐陽修浮槎山水記

浮槎山在慎縣南三十五里或曰浮閣或

曰浮槎二山其事出於浮圖老子之徒荒怪誕幻之說其上有泉自前世論水者皆弗道余嘗讀茶經受陸羽善言水後得張又新水記載劉伯芻李季卿所列水次第以為得之羽然以茶經攷之皆不合又新妄狂險譎之士其言難信頗疑非羽之說及得浮槎山水然後益以羽為知水者浮槎與

龍池山皆在廬州界中較其水味不及浮槎遠甚而又新所記以龍池為第一浮槎之水棄而不錄以此知其所說多失羽則不然其論曰山水上江次之井為下山水乳泉石池漫流者上其言雖簡而於論水盡矣浮槎之水發自李侯嘉祐二年李侯以鎮東軍留後出守廬州因遊金陵登蔣山飲其水既又登浮槎至其山上有石池涓涓可愛蓋羽所謂浮泉漫流者也飲之而甘乃攷圖記問於故老得其事跡固以其水遺於京師余報之曰李侯可謂賢矣夫窮天下之物無不得其欲者富貴之樂也至於蔭長松藉豐草聽山溜之潺湲飲泉石之滴瀝此山林者之樂也而山林之士視天下之樂不一動其心或有欲於心顧力不可得而止者乃能遠而獲樂於斯彼富貴之能致物矣而其不可兼者惟山林之樂爾為富貴者而不得兼然後貧賤之士有以自足而高世其不能兩得亦其

理與勢之然歟今李侯生長富貴厭於耳目又知山林之為樂至於攀援上下幽隱窮絕人所不及者皆能得之其兼取於物者可謂多矣李侯折節好學喜交賢士敏於為政所至有能名凡物不能自見而待人以彰者有矣其物未必可貴而因人以重者亦有矣故余為志其事俾世知斯泉發自李侯始也

黃山在府東百二十里接巢縣含山界其峰三百有六十有泉不涸故亦呼龍泉山亦曰金庭山又曰紫微山道書所謂第十八福地者也山有金庭洞可容三百人又有紫微洞出泉居民引以溉田

唐時又改名王喬山相傳王喬居此

冶父山在廬江縣東北二十里唐更名曰冶山宋碑曰鐵冶蓋冶鑄之所林巒峭密盤亘數十里自麓五里而至於巔上有龍湫亦曰鑄劍池濡須志云歐冶鑄劍處山比衆山特尊故稱父有子山三百六十四羅列其下蓋縣境之名山魏地理志云廬江郡潛縣有野父山即此

蜃山在廬江縣東北三十里下瞰白湖縣志云昔



曾有蜃出焉吐氣成樓臺殿閣之形

毛公山在廬江縣東七十里縣志云毛義隱此有  
毛公讀書洞石甃石窻猶存洞旁產白牡丹每歲  
所生不一其地相傳義父母甚愛此種義望天哀  
籲少頃遍山雪墜皆花後遂種延不絕蓋天生異  
卉也又北半里為蓮花洞中有石蓮下垂巧侔追  
琢山之東屬無為州

馬頭山在廬江縣東北七十里按晉書云毛寶援

桓宣於此上有桃花仙人二洞其山口曰石龍山  
西有渡曰馬頭渡

金牛山在廬江縣西北四十五里嶺有塔縣志云  
吳赤烏二年造下有金牛

關山在廬江縣西三十五里曹魏守隘之所石門  
尚存

龍池山在廬江縣西二十五里舊志作栢山上有  
龍池下有甘泉寺按唐書云廬江縣有櫟山櫟

相近或即此也縣北三十里亦有龍池一洞深不可測

馬槽山在廬江縣西四十里有大小二槽形勢連屬各山半有石槽大者長二丈小者長丈五六尺形成自天不假椎鑿槽旁有人馬足跡世傳魏武嘗立寨其上

大四山在廬江縣西四十里以形凹得名上有龍王祠下有仙女石山勢參差難狀其第三峰有風

洞巖深不可測投以草莖即隨氣飛起

百藥山在廬江縣南十里山多藥草相傳李百藥遊此故名宋碑作白若蓋音之訛也頂上棋盤石有仙人足跡蹋之聲如鼓聞數里又名石鼓隋地理志云開化縣有蹋鼓山即此乃邑鎮山也

福泉山在廬江縣南十里山下有泉清澈飲之可以愈疾南十里有菖蒲山產九節菖蒲

秀山在廬江縣南六十里山上有香爐峰世傳有

仙飛昇於此黃泥瓦洋二河於此發源縣志云石  
上鐫刻有秀拔東南水外屏障十數字

鳳臺山在廬江縣東南十里五峰排列中高如臺  
昔傳鳳集其上故名

礬山在廬江縣東南四十五里產礬宋時割置無  
為州今山在南鄉下有礬遂硃砂澗

鐘鼎山在廬江縣東南五十里一名鐘子山盤礴  
甚遠上有龍池縣志云山東西有泉四時不竭灌

溉田畝兩泉歲迭為盈縮妙不可測

暖塘山在廬江縣東十里下有溫泉四時可浴山多奇石嶺有二石屏玲瓏可愛

鹿起山在舒城縣東南三十里昔有僧過鹿出之事因名上有南嶽行祠祠前有試心臺洗劍池縣之鎮山也

春秋山在舒城縣南二十五里其上為李公麟讀書堂有洗墨池又有望湖尖鳳凰臺仙人峰諸勝

絕頂有洞可容數千人

磨劍山在舒城縣西南三十五里上有大石為仙人磨劍處

七門山在舒城縣西南三十五里山瀕大溪下有石洞如門者七即七門堰之上源也

雲霧山在舒城縣西南四十里其山出雲必雨上有洞名水簾

龍眠山在舒城縣西南八十里括地志云龍舒以

狀若龍之舒展也山之陰為龍眠砦與桐城界

三角山在舒城縣西南百二十里峰有三角故名  
又名多智山相傳上有清泉飲之令人聰慧其近  
者為陽山土人曾避兵於此

梅山在舒城縣西七十里縣志云舊傳梅福棄官  
隱此上有梅仙洞又十里曰竹山

王姥山在舒城縣西九十里縣志云相傳王姥修  
煉居此有白鹿啣花之異其近者為栲栳山



響山在舒城縣東二十五里人過其下輒有聲

紫芝山在無為州城內西南隅州志云宋皇祐間  
產紫芝三百五十本州守茹孝標獻於朝賜今名  
眉山在無為州西南百里兩山連曲如眉

三公山在無為州西南百二十里見隋志上有三  
峰因名峰頭皆東顧唐天寶中改名東顧山山勢  
連亘數百里西界廬江南跨桐城上有洞砦明季  
流寇縱橫江北居民倚以避亂相近有九卿山山

有九峰

桐山在無為州西九十里有水道通白湖漁人用箔取魚故又名上箔蓋即隋志云廬江縣上薄山也又有下箔山

天井山在無為州西九里有泉二左曰青龍右曰白虎故亦名雙泉山其下有楚雲洞

朝喜山在無為州西北四十里旱時朝有雲氣是日必雨故名

白石山在無為州西北四十里山多白石頂有龍池仙人洞隋地理志云襄安縣有白石山即此州故襄安縣地其右為黑石嶺為桃花嶺為楚歌嶺呂泉山在無為州西北五十里州志云又名龍泉山其形似龍上有水泉世傳呂洞賓過此插劍而泉湧纍纍如貫珠故名其近者為銀鉚山一峰特起如銀鉚州之主山也

青檀山在無為州北五十里產青檀北魏拔僕蘭

設伏檀山破宋將魯爽即此水經注云檀山在廬  
江雩婁縣南大別之異名也決水出焉或曰即禹  
貢之大別山殊誤

五畝尖山在無為州北五十里州志云頂平五畝  
許可種植面臨巢湖羣山背峙登巖望之萬頃皆  
碧回顧則崇峰疊嶂隱見爭奇乃州中極高處也  
卧牛山在巢縣治後以形似名為邑之鎮世傳巢  
許隱此其故址今紫微觀是也輿地志云山背有

樂王城

東山在巢縣東三里相傳即許由之箕山

七寶山在巢縣東南三十里三國時濡須山為東關此山為西關上有烟霞亭今廢其南有龜山

大秀山在巢縣南三十里山峰聳秀訾家河出焉  
宋楊傑詩所云水入平湖千里遠山橫大秀一峰  
高是也其側有黃谷嶺邑人薪樵於此蔣家河出  
焉

踟躕山在巢縣南三十七里左傳楚子觀兵於坻箕之山又陳荀朗破郭元建於踟躕山蓋坻箕踟躕音相近今散兵灣即其處也又縣南六十里有高林山七十里有九峰山

居巢山在巢縣西南八十里谿谷間有石研之如墨舊名墨山唐改今名

萬家山在巢縣西北二十里為四會之衝上有止渴泉舊時亂石壘錯明景泰中邑令閻徽修治始

有路可行

八公山在巢縣西北七十里一名紫金山水經注云上有淮南王劉安廟綱目集覽云王與八公憇石處在壽春此則王遇八公處也

半湯山在巢縣東北十五里有二泉一冷一熱合流其初冷熱仍異數里之外始相混魚自冷泉觸熱急回羅隱詩云飲水魚心知冷熱濯纓人足識炎涼按隋志云襄安縣有半陽山今或以湯池故

譌為半湯

附

明聶芳半湯池

記

聞之西北之山有

有湯泉焉予奇之亦甚疑之後應試榕城友人為  
言五里外有池可浴拉予往爾時塵冗何暇探幽  
選勝一證胸中之所疑蓋予之耿耿猶未釋也辛  
丑治巢取邑乘問之離城二十里許地名半湯有  
溫泉於是掩卷嘆曰予之疑其從茲釋乎及過其  
處諦視溫泉之源沸沸從下空湧若烹茗之松濤  
蟹眼狀從此掬水入池池不甚廣周圍結砌池之  
上覆以數椽又從內引出分二小池內清而外稍  
濁每歲夏秋之間車騎絡繹解衣盤薄致足樂也  
至若樵者牧者耕而鋤者負擔者靡不就而盪滌  
稱快事焉吾夫子曰清斯濯纓濁斯濯足如斯之  
內外迴分貴賤俱適有道君子流連其間當必有  
喟然而嘉嘆者矣獨是既有勝地而敗壁頽垣荒  
榛密莽非唯不足以游目騁懷竊恐歌傾之餘終



成瓦礫不大為缺陷事耶子捐貲庀材構一庭以覆內池中堂軒敞可供宴飲又為廊廡以蔭外池行路往來聊用駐足予差慰矣豈徒以釋前此之疑哉夫湯泉亦既驗之矣寒火猶未之見則猶不能無疑也雖然無疑也海鹹而魚沫鐵堅而虫啣天地間理之所無間為事之所有事之所有終不為理之所無類如斯也夫

亞父山在巢縣東北二十里范增所居隋志云襄安縣有亞父山形似旗故亦名旗山

白茅嶺在廬江縣西四十里即唐志所謂白茅山也路達舒城

天台嶺在舒城縣西南百里最幽勝土人擬於天台故名

芙蓉嶺在無為州北五十里亦名浮濃嶺山石險峻明正統間知州王仕錫開鑿以便行旅接巢縣界鶴石崖在舒城縣西南十五里兩石並峙俗名小赤壁

呂仙洞在無為州西北七十里石床藥臼世傳呂仙於此搗藥

主簿原在舒城縣西南百六十里縣志云崇山環之其中平行相傳唐畢誠讀書於此

馬蹄岡在舒城縣西南石上有馬跡世傳天馬過此

大江在無為州南自桐城縣抵無為州界東北入於含山凡無為州之水皆納於江其他諸縣之水多由巢湖以達於江

金斗河源出雞鳴山東流入於郡城復自東門出

至金斗驛又府南三十五里有派河東四十里有店埠河與此并入巢胡

茅埠河在府北百一十里東流由含山河入江

三河在府南九十里合廬江舒城二河水而入巢湖亦曰三汊河

新河在廬江縣東半里流入東水關遶學宮出南關會繡溪水而注於湖相傳楊吳時鑿

沙溪河在廬江縣東南十五里出大凹山東北流

入沙湖

石槽河在廬江縣東南四十里出礬山與瓦洋黃泥二河俱入於黃陂湖

羅昌河在廬江縣南五十里源出大凹諸山南流從袁子港入江又縣西南四十五里有高子河上接曹王河下至孔城白兔諸河入於江

會市河在廬江縣北四十里源出馬槽山又縣北二十五里有桐關河東北三十里有清野河七十

里有谷勝河與此俱入巢湖

順江河在廬江縣東北三十五里棲鳳諸山之水  
合流於此與縣東北五十里之盛家河七十里之  
關河俱入白湖

七里河在舒城縣西七里為西山衆流之會經南  
溪入巢湖

永安河在無為州西四十里又州西十里為裏河  
與此俱入於江

黃落河在無為州北四十里源自焦湖流入於江  
裕溪河在無為州東北百二十里又州東北百里  
有樸樹河東北四十里有運河合於馬腸河俱入  
大江

花林河在無為州城東源自大江上接三溪河下  
接黃金岡大河復經裕溪河出江

輿龍河在無為州東百二十里東接大江下通樸  
樹河復出於江又州東三十里有一箭河五十里

有柵港河

三溪河在無為州東南二十里與直皂河俱入大江

高林河在巢縣南六十里以山得名

柘皐河在巢縣西二十里源出合肥浮槎山入於巢湖宋史云劉錡敗兀朮於此又縣西五十里有銅錫河六十里有白露河七十里有巧溪河花塘河八十里有金塘河



清溪河在巢縣東南十五里發源於含山之清溪鎮流入濡須水

巢湖在府東五十里一名焦湖周四百餘里占合肥舒城廬江巢四邑之境港汊大小三百六十為淮西巨浸舊傳巢湖為湖滄桑之變世嘗有之但郡國志與青瑣高議所載巫與老姥龜目出血城當陷云云一事兩傳且與歷陽湖同語頗涉誕恐未可據也

沙湖在廬江縣東南十里合於黃陂湖及諸山之  
水東出缺口

白湖在廬江縣東北三十里周七十餘里跨六鄉  
之地與黃陂後湖相連為邑巨浸

黃陂湖在廬江縣東十五里湖水常渾賓興之  
歲每一澄清邑必奪解合白湖諸水自泥汭入  
江

繡溪在廬江縣西五十里出馬槽山經縣南昇仙

橋滙為黃陂湖

桃溪在舒城縣東北三十里一名桃城水源出六安淠河入於巢湖

南溪在舒城縣南門外水源出孤井經七門環縣治而東入於巢湖

錦繡溪在無為州西南十里宋時分而為二故名雙溪亦名錦繡池

肥水在府城西南源出紫蓬山北流二十里分為

二其一東南流經合肥縣入巢湖梁韋叡堰水以灌合肥在此其一西北流入壽春出淮晉謝玄破苻堅處也爾雅云水歸異出同曰肥南畿志云肥水東北經雞鳴山入金斗河一支西北流復東轉南下至東門外余公廟前二水相合故曰合肥今上源已堙塞縣治之得名蓋以此

濡須水在巢縣南一名天河俗呼馬尾溝源出巢湖東流經亞父山又東北注裕溪入於大江

龍潭在府東北每山水乍溢羣魚猝至漁者所獲必倍焉又舒城縣西亦有龍潭邑令劉顯作壩以灌諸堰處

鵲尾渚在舒城縣東北舊有鵲亭左傳楚人伐吳吳人敗諸鵲岸杜預註云舒城鵲尾渚是也按鵲尾渚與銅陵縣鵲頭山對面當在無為州界無為舊屬舒城故名

孤井源在舒城縣西百五十里志云俗稱孤靜源

其水經七門三堰旋遠通於南溪入巢湖

鐵索澗在府西北八十里澗東窮處一潭甚深渟泓洄演四時不竭晉謝玄破苻堅處也舊傳嘗有鐵索見於水際

笑泉廬江縣有二一在魯班塘內聞人笑聲水輒湧沸高尺許一在發洪山兒童笑則泉亦湧也故名笑兒泉

左慈泉在昇仙橋外世傳魏左慈常遺丹粒其中

宋政和間清夜氣肅紅光燭天鄉人呼曰丹井舊  
志作左慈井

鳳陽府

鳳凰山在府北勢如鳳翔郡治據焉故以名郡連  
萬歲山明築皇城於此東有二峰對峙一名日精  
一名月華又東三里有獨山舊建觀星臺處

曹山在府西三十里舊傳魏武曾駐兵於此

畫山在府西五十里山有木枝如楊柳可用畫故

名

廟山在府南十五里其上有伍子胥廟又府西南四十里有靈山六十里有尹家山

雲母山在府西南三十里產雲母石西南二十里有石膏山產石膏

長安山在府南四十里東西平行東曰東堡鄧甲店西曰打虎店峰巒殊勝

杏山在府南六十里吳時董奉種杏於此後服杏



丹仙去

鑞鄒山在府南八十里相傳昔莫邪於此鑄劍故名

蔣山在府東二十里梁時鍾離之捷梁主夢金陵蔣山之神許以助兵遂立祠祀於此而因以名山梅城山在臨淮縣東四十里下有梅城邨又東十里曰石門山山下有石如門

化明山在臨淮縣東六十里隋置化明縣因以名

山

烏雲山在臨淮縣東南六十里亦名烏霧山以山多濛霧也與定遠縣接境

鹿塘山在臨淮縣南二十八里山下有白鹿塘又縣南三十五里有留甫山其下有留甫邨五十里有小橫山

濠塘山在臨淮縣南六十里濠水出焉山有石穴出鍾乳又名鍾乳山

昇高山在臨淮縣西南五十里俗以九日登此山故名東西二濠水合流於此

闌干山在臨淮縣西二十里山相連如闌干狀

礪山在臨淮縣東北六十五里山有石洞世傳仙流所居

塗山在懷遠縣東南八里與荆山兩岸對峙而淮流經其中古塗山氏國於此春秋傳云禹會諸侯於塗山杜預謂在壽春東北者是也山下有禹墟

及禹會邗又山半有聚仙臺卧仙石又有靈泉澄  
瑩不竭其南麓曰九岡岡形夾澗起伏有九俗名

九岡十八窪適府之通衢

附

唐柳宗元塗山銘并

序

惟夏后氏建大功定大位立大政勤勞萬邦和  
寧四極威懷之道儀型後王當乎洪荒方割災

被下土自壺口而藁百川大功建焉虞帝耄期順  
承天歷自河南而受四海大位定焉萬國既同宣  
省風教自塗山而會諸侯大政立焉功莫崇乎禦  
大災乃賜元圭以承帝命位莫尊乎執大象乃輯  
五瑞以建皇極政莫先乎齊大統乃朝玉帛以混  
經制是所以承唐虞之後垂子孫之丕業立商周  
之前樹帝王之洪範者也嗚呼天地之道尚德而  
右功帝王之政崇德而賞功故堯舜至德而位不

及嗣湯武大功而祚延於世有夏德配於二聖而  
唐虞讓功焉功冠於三代而商周讓德焉宜乎立  
極垂統貽於後裔當位作聖著為世準則塗山者  
功之所由定德之所由濟政之所由立有天下者  
宜取於此追維大號既發華蓋既狩方嶽列位奔  
走來同山川守神莫敢違寧羽毛四合衣裳咸會  
虔恭就列俯僂聽命然後示之以禮樂和氣周洽  
申之以德刑天威震耀制立謨訓宜在長久厥後  
啟征有扈而夏德始衰羿拒太康而帝業不守皇  
祖之訓不由人亡政墜卒就陵替向使繼代守成  
之君人能紹其功德修其政統卑宮室惡衣服拜  
昌言平均賦一制度定期會則諸侯常至而天命  
不去矣茲山之會安得獨光於前歟是以周穆遐  
追遺法復會於是聲垂天下亦照前軌用此道也  
故余為之銘庶後代朝諸侯制天下者仰則於此  
其辭曰惟禹體道功厚德茂會諸侯衛統一憲度

有方宣教化制殊類咸會壇位永奉儀矩禮具樂  
備德容既孚乃舉明刑以弼聖謨則戮防風遺骨  
專車克威克明時敢以渝宣昭黎獻考定混區傳  
祚後昆丕承帝圖塗山巖巖界彼東國惟禹之德  
配天無極即山刊碑昭後作則

洛河山在懷遠縣南六十里以近洛而名其西峰  
曰洪山東峰曰神山出煤炭

平阿山在懷遠縣南六十里與壽州接境漢置平  
阿縣以此俗誤為平戕

荆山在懷遠縣西南舊志云山西北有玉坑相傳

卞和得玉處其中白石晶瑩不受鑿刻東有卞和洞一名抱璞巖可容數十人上有瀑布又有三仙避雨石仙人睡迹白龜泉北有濯玉澗南麓有梅澗蕭梁時於山下立堰以遏淮流曰荆山堰山之餘支為龜山為橫山

附

明宋濂遊塗荆二山記

濂既

遊瑯琊山起行至池河驛適郵卒遞內使監公牒至及開緘中藏濂梁古蹟一卷宸翰親題其外令濂搜訪與青宮言之濂因啟曰臨濂古蹟惟塗荆二山最著按圖經塗山在昔鍾離縣西九十五里荆山亦在縣西八十三里二山本相聯屬而淮水繞荆山之背神禹鑿開使水流二山間具疏鑿之

跡故在人思其功迄今弗能忘青宮曰至中都當  
共往遊焉余將渡淮狩於王莊先生宜沂流而上  
屆今懷遠縣治以俟濂奉勅行以洪武乙卯冬十  
一月己巳發舟庚午日曠始泊縣西門而青宮已  
駐蹕於東門五里矣辛未濂上謁青宮喜甚下令  
以壬申遊二山濂至期約懷遠文學掾王景彰宿  
舟中黎明擢舟至塗山足曳杖入山山旁廢址舊  
皆民廬前渡石梁復斗折而北累石為塘多藝椒  
之園行可三里餘視大磐石青綠間錯頽然歆足  
坐諦視之乾蘚交封之耳聞有草生石上高一尺  
其花可愛不假土力人取懸檐間呼為石蓮花復  
行四里所巖石犖确插起道左危傾欲飛墜復二  
里所從微徑入灌莽抵崖罅貯泉一泓味甚甘覆  
以生茨曰聖水亭取水以烹雨多驗復一里餘至  
山巔禹廟在焉廟已毀惟頽垣破礎存遊目四顧  
長淮西來渦河北匯而壽春臨濠宿州之境皆在



冥茫昏杳中緬想南北戰爭屯戍處為感慨者久之山之下聚落甚盛廟史云名禹會邨乃禹會諸侯之地盧舍之比如櫛移踵入廟廟前杏樹一章大可蔽牛二柏參差左右樹東寘小甕杏柯之水時津津滴其中廟史云當辰霧四集水愈多其來如泉可代井汲石碣二一大書有夏皇祖之廟六字下方刻宋慶元初州守劉仲光自造禱雨記一亦記禱雨事皇甫斌紹興庚戌來為郡命鍾離尉丁大榮作石未剝泐文尚可讀復從廟西循石坡而下鉅石危立如人形遙望之一嫗儼然也相傳為啟母石廟史云居人每封羊豕祭之至有以粉黛飾其貌者聞之不覺大笑山坳舊有僧房今廢久俟鶴駕不來忽使者至云扈從士馬多無橋可渡河青宮不復至矣言未既但見旌旗如錦繡搖曳上荆山矣濂亦下山麓入鯀廟見所題神號鄙俚素而不睨出讀祖無擇所賦歌京口孫臨為

書碑蓋無擇謫守壽春過此而作也復北經縣治折而東行三里所至荆山梁魏交鬪時就山築堰以灌壽春其遺蹟猶班班可見復行三十步崖广如屋側身而入石屏如床座可坐人號為卞和洞自西上復一里所過避雨石石斜倚可避雨故名復六十步至產玉坡奇石駢列西有玉池榛荆迷路不可尋時青宮已獵遠郊濂因登舟先還中都云惟二山見諸戴記者多殊以塗山言之春秋左氏傳云禹會諸侯於塗山杜預注云在壽春縣東北說者云今濠州是也國語史記則又云禹會諸侯於會稽故會稽亦有塗山吳越春秋亦有塗山在會稽應劭云塗山在永興北說者云今會稽蕭山縣是也是二說已不能歸於一致矣至於蘇鶚演義又云塗山有四一會稽二渝州三濠州四當塗然其處皆有禹跡或者遂謂禹之治水固嘗徧歷宇內而會諸侯實在會稽之塗山椰子厚塗山

銘蘇子瞻子由塗山詩指在濠州者皆非是濠之  
存疑而未決者一也以荆山言之荆山楚山也楚  
之先王熊繹僻在荆山七傳至昭王始遷都郢  
即今之江陵其地有荆山一名景山荆故楚號也  
有之誠宜世則指為濠州濠州古鍾離子國與壽  
春密邇楚自昭王之後歷十一傳始徙都壽春韓  
非子所載卞和獻玉事乃在厲武文三王之際昭  
王上接武王已越十世當三王時鍾離何嘗屬楚  
而強謂卞和至此山耶新序又謂抱玉而泣在共  
王之時雜記又謂在懷王及其子平王之時平王  
乃昭王之父下拒懷王九世共王上至武王亦六  
世何顛倒如是耶濠之存疑而未決者二也大抵  
山川遺跡非本諸經史者多不可信必欲可信塗  
山當稽之左氏以壽春為正荆山當正諸史傳以  
江陵為正有謂塗山氏乃古國名禹曾娶其女者  
別是一說與此殊不相涉也濠耄矣諸書遺忘欲

盡所記憶者未必無舛訛  
輒緣紀遊因掛漏書之

相公山在定遠縣東六十里有楚相令狐子伯廟  
因名稍西有豁鼻山東樂山

大橫山在定遠縣東七十里其山橫界邑之東南  
故名山頂有石壘舊址西南有石佛高丈餘相近  
有皇甫山相傳昔有皇甫將軍屯兵於此

華蓋山在定遠縣東南二十五里頂圓覆如蓋又  
縣東南六十五里有喜龍山朗峰山

槎枒山在定遠縣西七十里山形槎枒古有槎枒  
寺明洪武間改建圓通禪寺中有芝巖洞

三峰山在定遠縣西北三十里山有三峰秀麗特  
異有禪窟洞石窟泉多修篁古木

韭山在定遠縣西北四十五里地煖多韭故名山  
上石城兵火時常保聚焉山下有洞其中澗水常  
流石形如器物者甚衆左右多唐人題刻後為峻  
巖遊者莫能至相近有青山有銅骨山青翠相接

橫澗山在定遠縣西北七十四里上有石壘及澗泉

白石山在定遠縣北三十五里多白石相近有大紅山多紅石

秦橋山在虹縣東北二十里有秦氏所造橋下有泉兩派分流左清右濁

朱山在虹縣東北三十五里上有靈祐祠祀梁之朱買臣俗誤以為漢之買臣上有聖水泉甘而冽

南有峰山界泗州

赤山在虹縣東北七十里四面皆水

石龍山在虹縣北二十里上有石蟠伏如龍鱗甲  
儼然

屏山在虹縣北二十里列翠環抱若屏一作平以  
山勢平行而名下有平山湖

鹿鳴山在虹縣西三十五里相傳明成祖嘗駐蹕  
其上夜聞鹿鳴因名

紫金山在壽州東北十里五代史云周顯德四年  
征淮南南唐援兵營於紫金山與壽州城中烽火  
相應宋太祖率殿前諸軍擊紫金山連珠砦拔之  
遂下壽州即此上有淮南王宴客處間拾小金牌  
可療疾疑丹砂所化也

黃閭山在壽州東北五十里州志云世傳楚春申  
君黃歇嘗遊於此寰宇記云州東北八十里有舜  
哥山相傳舜耕此上有大人足跡



峽石山在壽州西北二十五里夾淮為險郡志云  
在下蔡西南寰宇記云兩峰相對水經其中對岸  
山上築二城以防津要魏諸葛誕舉兵王永據峽  
石以逼誕晉胡彬據壽春城陷退保峽石即此處  
也兩岸石上有大禹疏鑿舊蹟山口有茅仙洞

八公山在鳳臺縣東北五里肥水之北淮水之南  
漢淮南王安與其賓客八人學仙於此因名晉史  
云苻堅兵敗望見八公山草木皆晉兵即此一名

肥陵山州西北有青岡晉謝玄乘勝追擊苻堅至

青岡

附

梁吳均八公山賦

峻極之山蓄聖表仙南參差而望越北邇迤而

懷燕爾其盤桓基固含陽藏霧絕壁峻巖層巖迴互桂皎月而常圓雲望空而自布袖以華閭帶以潛淮文星亂石藻日流堦若夫神基巨鎮而卓犖荆河箕風畢雨育嶺生莪高岑直兮蔽景修坂出兮架天以迎風而就日若從漢而迴山露泣葉而原淨花照磯而岫鮮促嶂萬尋平崖億絕上披紫而生烟傍帶花而來雪維英王兮好僊會八公兮小山駕飛龍兮翩翩高馳翔兮翀天

四頂山在鳳臺縣北七里東與八公山相對

打鼓山在宿州北三十里上有三峰東北有二泉

可溉田揭傒斯望光樓記云山中有聲如鼓鳴歲則大熟

離山在宿州北五十里產符離草爾雅所謂莞也秦以此名縣史記陳涉傳初起兵有葛嬰朱雞石符離人

騫山在宿州北七十里以山有閔子騫墓而名墓左有龍浣潭

睢陽山在宿州西北三十里山在睢水之陽故名

舊作諸陽

芳巖山在宿州西北六十里旁有石巖四時芳馥  
相近為邱疇山

相山在宿州西北九十里相城鄉周二十里甚危  
峻舊有相山碑記云巍巍相山盤紆穹崇上應房  
心與天靈冲其西南為天馬山西控汴河

嵇山在宿州西南百有十里嵇康家於其下因氏  
焉

龍車山在靈璧縣北二里縣之主山也山之陽有石泉又北三里為栲栳山迴環如椅故名

磬石山在靈璧縣北七十里山出磬石故名禹貢云泗濱浮磬即此揮塵錄云宋政和間起艮岳靈壁貢一巨石高二十餘尺周圍稱是舟載至京師千夫舁之不動裕陵以為神物表異之親書慶雲

萬態奇峰六字加金帶其上頃刻移至苑中

附明

王守謙靈壁石考

石之堪作玩者吾靈壁石稱最謂其峰空洞穴渾然天成骨古

色點扣之有聲按踏有形如蟠螭如菌菴如臥牛  
者又有臥沙不起峰者甚有盡天劃神鏤之巧者  
總之萬石萬局於深山中掘之乃得不知的係何  
時發坑第考之載籍宋以前未聞有靈壁石按檇  
李項氏有靈壁石一座長二尺許色青潤聲亦沉  
然皆有黃沙文一帶峰巒皆雋下金填刻字云宣  
和元年三月朔日御製御書其下押一字又大衍  
庫有靈壁小峰長僅五六寸玲瓏秀潤所謂胡桃  
玉色藏宗御書八小字刻於峰旁云山高月小水  
落石出畧無刻琢之形觀此則靈壁石始見於宋  
曾為至尊之寶愛其品可知已自米顛酷嗜而聲  
價益重其為楊次公搜去者乃所謂盡天劃神鏤  
之巧者也後得李後主所寶靈壁研山徑長纔踰  
尺前集三十六峰高者為華蓋峰其參差錯落者  
為月岩為玉筍為方壇為上洞為翠巖又有下洞  
三折而通上洞中有龍池遇天欲雨則津潤滴水

少許在池內則經旬不燥米老甚珍之及其歸丹陽也愛甘露寺下並江一古基多羣木唐晉人所居則薛氏之宅也時米欲得宅而薛覲得研於是竟相易米後號海岳菴者是已公終悅惜乃云此石一入渠手不得再見每同交友往觀亦不出示紹彭公真忍人也蘇東坡畫醜石風竹易得張氏靈壁石一株具有四面如麋鹿宛頸狀後戴歸陽羨趙松雪有靈壁石香山一座下刻雲根二字又一石其大如拳峰巒皆五列公名之五老峰手抓之拂之亦有聲此皆得之本子上者也余在南中曾見一靈壁石長僅數寸十二峰參差突起毫無雕琢又一石天生雙螭蟠結中有小水池如錢許大其黑如漆間有細白紋如玉扣之聲泠然此天下所無而靈壁獨有偶一有之而絕不復出良不可解然余猶及一見耳又見如卧牛者想亦宋元舊物流傳人間者矣國朝垂二百六十餘年寥寥

無聞即問之上著者亦竟不知靈璧石為何物迨萬厯己酉南臺侍御眉山鴻臚張公訪此石甚殷乃好事於磬石山澗壑中乘雨後覓之稍稍見一二於是習茲山者凡牧豎樵子莫不求石有力者遂發坑取之而石漸出矣歲庚申庠師吳興長組先生天中濟源先生親往采石而郡侯竟陵別鳳藻先生單騎往視之僉稱南宮之後再睹此舉亦稍稍獲有佳者其人情好尚之極即山靈亦終難秘其珍遂為此石之復興與此後掘石者日益夥竊人不愛善價買舟載去一入靈境莫不侈口譚石突然風尚良可駭異走南中販石者踵相接而格價頓減惟睹有峰壑洞穴而清潤有聲者亦取狂狷之意求所謂研山蟠螭與盡天劃神鏤之巧者則絕不可復得矣蓋物之尤者多見於始出而其後漸銷落也端溪下岩發於宋而竭於宋安知今日之石不將為廣陵散乎海內王元美之祗園



董元宰之戲鴻堂朱蘭嵎之柳浪居米友石之勺園王百穀之南有堂曾蓮生之香醉居劉際明之悟石齋劉人龍之夢覺軒彭政之之畫室清玩充斥而皆以靈壁石作供果得未曾有乎而諸公之韻固均足以敵之矣獨喜吾邑劉節齋先生其別業觀音閣前一石徑數尺嵌空玲瓏色極清潤先生鍾愛之令此石旦暮聞鐘磬聲且與蒼松碧梧相依傍則其清怡其神往片石堪共語其在斯乎或云此係張氏園亭物然竟非新坑石也

潼山在靈璧縣北七十里潼水出焉世傳莊子嘗修道於此有南華觀

陳疇山在靈璧縣北八十里陳疇堡亦名陳擲山

相傳希夷常寓於此有希夷洞

張山在靈璧縣西北九十里其西五十里有貢山  
屬蕭縣相傳子張子貢遊學之地

齊眉山在靈璧縣西南三十里山開八字如列眉  
建文三年徐輝祖敗成祖於此

孟山在靈璧縣東北七十里相傳孟子嘗遊此山  
下有娑羅樹歲以枝葉先發所向之方為豐兆  
分水嶺在臨淮縣東九十里其水東入盱眙西入

臨淮

斷梅谷在懷遠縣荆塗二山間或曰二山本為一脈禹以桐柏之流泛濫為害乃鑿山為二以通之今兩山間有斷梅谷濱淮為勝云或曰周世宗以荆塗有王氣斷之時谷有梅氏聚族居焉因名劍山在定遠縣西北相傳山有寶劍雨過或倚路傍

龍子河在府西三十里源發南山北匯為湖經長

淮關入淮

天河在懷遠縣南五里源出府治之利山西北流經塗山南入淮又縣西有汭河西南有茨河俱發源蒙城至縣入淮

淝河在懷遠縣北二十里出宿州之龍山湖流經蒙城縣界東南至縣之雙墩入於淮有魚鳧菱茨之利按此乃淮北之淝水也

清溝河在懷遠縣北二十里自宿之龍山湖東南

流合十湖天堰諸水至縣北會淝河而水始大舊  
自靈璧南境至府治沫口河入淮今下流淤塞時  
有泛溢之患

池河在定遠縣東南六十里自廬州巢縣界流入  
境內又東北經盱眙入於淮

潼河在虹縣西南二十里南潼河源出羊城湖經  
縣治西南入泗州北潼河出縣西北東流入睢水  
沱河在虹縣西南源於宿州紫蘆湖經縣東九都

為南沱河西九都為北沱河二水合流入五河縣  
東肥河在壽州東北十里源出合肥之紫蓬山北  
流二十里分為二其一東南入於巢湖見廬州府  
其一西北流二百餘里至州境入於淮按此乃謝  
玄破苻堅處淮南之肥水也又西肥河在壽州下  
蔡西南十里亦入於淮

大香河在壽州東南三里自芍陂大香門分流九  
曲至州三里橋北入於淮乃唐宋運河元始淤

解河在宿州東南又曰蟹河源出州西之仁義鄉  
東流經靈璧縣西南入淮

泡河在宿州南九十里源出亳州舒安湖經州之  
舊臨渙城合澮水

澮河在靈璧縣南七十里源出河南永城縣馬長  
河東流歷宿州至縣境東南入五河縣界

小河在靈璧縣北六十里即睢水項羽追破漢軍  
多殺士卒睢水為之不流是也

月明湖在臨淮縣東一里北流入淮

萬安湖在虹縣西北即潼陂也宋朱弁詩云離汶  
未逾千里道渡淮先泛萬安湖舊志云疑即今之  
天井湖又縣西南四十里有老營湖

羊城湖在虹縣西北四十里古虹州城沒於此

四山湖在虹縣東北四山下又有峯山湖在峯山  
下與泗州接境

西湖在壽州西門外一名熨湖又名尉升湖水經



注云羊頭溪水受芍陂西北流經熨湖是也

焦岡湖在壽州西三十里相近為董奉湖

紫蘆湖在宿州西產蘆色紫

石湖在靈璧縣東北十五里中有巨石水消長不  
過舊痕人以為異

淮水在府北十里自潁上縣抵壽州經懷遠之荆  
塗二山至府治北東過臨淮入於泗州

渦水在府西北自蒙城縣界流至懷遠東入於淮

謂之渦口唐李吉甫云濠有渦口之險謂此漢建安中曹操引軍自渦入淮南北朝為控扼地

濠水在府南十里有二源東出濠塘山西出鏐鄒山至昇高橋合流又東北入於淮其水經府治及臨淮縣境臨淮西南有石絕水謂之濠梁即莊惠觀魚處也

洛水在懷遠縣南七十里自定遠之清洛澗流經壽州至縣境入淮亦曰洛澗注淮處曰洛口

汴水在虹縣南自開封東來經宿州抵縣境東南至泗州入淮

淖水在壽州西七十里源出霍山東經霍邱縣至州境北流入淮方輿勝覽云淖有蛟害楚芊乙射之遂絕

睢水在宿州北二十里自河南夏邑縣白河經州之符離會泗入淮其上流之支為瞿溝亦曰曲溝又州之蘄縣鄉有蘄水渙陽鄉有渙水即濊水

浹水在靈璧縣東南入於淮

響水潭在虹縣西門外潼汴合流至橋下波濤相擊聲如雷吼

白馬潭在虹縣南二十里水中有石廟曰龍王廟有見白馬出沒其中者禱雨時應

龍浣潭在宿州閔子鄉武城里之左歲旱禱雨即應

響水澗在臨淮縣城東又有蕉子澗紅娘子澗蓑

澗沙澗青山澗俱入於淮

碧溪澗在懷遠縣南一里自荆山下曲流經城中入淮又有冷水澗茅澗柴澗俱入於淮

清洛澗在定遠縣西八十里晉謝玄率諸軍涉洛澗敗秦兵於壽陽即此

粉團洲在府西北三十里睢水之南洲上多白沙故名明初於此築城設衛即今之長淮衛也

芍陂在壽州南安豐廢縣亦曰安豐塘又曰期思

陂楚相孫叔敖決期思之水即此詳見水利

漢泉楚泉俱在定遠縣西五十里二泉俱紆迴自南而西合流入洛

吐泉在壽州北五里泉與地平每聞人聲水輒湧出如珠又名珍珠泉

江南通志卷十七

欽定四庫全書

史部

江南通志卷十八至二十

詳校官給事中<sub>臣</sub>丁雲錦

檢討<sub>臣</sub>德生覆勘

總校官編修<sub>臣</sub>王燕緒

校對官中書<sub>臣</sub>葉炎

謄錄貢生<sub>臣</sub>李嗣圖

欽定四庫全書

江南通志卷十八

輿地志

山川

潁州一府滁和廣六泗五州

潁州府

藥山在霍邱縣南八十里山產半夏蒼朮諸藥

九仙山在霍邱縣南百里有石曰凡九

梅山在霍邱縣南二百里



望到山在霍邱縣南二百二十里可望而難到言其峻也

大別山在霍邱縣西南八十里一名安陽山界河南固始縣亦名檀公峴相連有芙蓉山

長山在霍邱縣西八十里三山相連曰南長山北長山中長山其相近者曰高祖山接固始縣相傳漢高祖追項羽屯兵於此

萬壽山在太和縣北九十里宋名縣曰萬壽以此

駝山在蒙城縣西二十里山首尾高而中陷故名  
靈山在蒙城縣西北二十里下有洞及泉皆以黃  
伯名又五里有齊山與此相連

狼山在蒙城縣西北二十八里有南北二峰對峙  
山陽有當陽寺巔有天池泉

檀城山在蒙城縣北四十里山桑城內峰極聳秀  
檀道濟築城於此

七旗嶺在府治南七十里北臨谷河元王保保曾

屯兵於此

金牛嶺在府治南百二十里淮水北岸

鐵牛嶺在蒙城縣西北八十里

安舟岡在府治南九十里淮水北岸

仁勝岡在府治西南百四十里近艾亭又五里曰

熬鼎岡在汝水北岸

黃岡在潁上縣西南二十里淮水南岸又垂岡在

潁上縣東南四十里淮水北岸

虎頭岡在亳州北二里迴伏數里為城北之屏障  
又州南一里曰南虎頭岡

管谷在潁上縣北二十五里相傳管仲家於此

青邱在府治東五十五里潁潁古有青邱縣今名  
青邱村

金邱在府治南八十里舊志云楚王埋金於此以  
鎮水災

中村岡在府治南七十里南臨谷河環岡皆村落

故名

大潤河在府治南五十里源於土陂地泉受小潤河之水東南入淮

清河在府治南相傳楚靈王所鑿五代時刺史王祚為疏其故道名曰清河流入於潁

谷河在府治南九十里源自潤河經一虎橋至水臺西入淮

蒙河在府治南百里自紅林東陂積水成河西流

入淮

西茨河在府治西自太和縣南流入於沙河又北  
茨河在府治北即古細水也

流鞍河在府治西源自項城縣經沈邱入於潁水  
柳河在府治西五十里源自白楊湖經廢柳河驛  
至石羊舖入舊黃河又有舒陽河合於此

延河在府治西沈邱鄉自新蔡東流入境又東北  
過楊橋入潁水

舊黃河在府治西北金之季年決於太康西北自陳州界入府境流經城北元末又自南頓合潁水東流明正統二年復徙鹿邑黃流遂絕成化末一支復通於潁今亦絕

肥河在府治北百一十里自太和縣流經府境東南至壽州下蔡西入淮所謂西肥河也

史河在潁上縣東十里源於河南固始縣流經霍邱縣北入淮潁水之支流也

濟河在潁上縣北五十里源出亳州東北流合肥水入淮

洩河在霍邱縣東南二十五里源自六安州香和嶺分流入於東河東河亦源於六安入淮

新河在霍邱縣北二十五里其水在宋宣和前不通舟楫建炎以後湍流衝激水勢漸大東北合於淮

雉河在亳州東百二十里南流入渦與蒙城界



漳河在亳州南三十里東北流入渦俗謂之欠水  
相近有十字河又有百尺河三里河明河油河三  
丈口河清水河俱入於渦

肥河在亳州南八十里東過太和縣入本府界  
黃河在亳州西北三十里元末嘗自通許分派流  
入渦河

包河在亳州西北二十五里東流入馬尚河

馬尚河在亳州北由歸德府來至州境入於渦河

沙河在太和縣南二里自沈邱縣流經界溝入縣之西南達亳州境入潁俗呼為惠民河

柳河在太和縣南三十里舊黃河支流也上通項城下達潁州入於沙河

宋塘河在太和縣北六十里亦茨河分流經宋王城茅岡至縣雙泉溝入穀河

銘河在太和縣北九十里西通陳州蔡河東接肥河流至斤溝入茨河

穀河在太和縣東北三十里茨河之南自卧龍分  
流至七里澗而入茨河

茨河在太和縣東北六十里自鹿邑縣流入縣境  
又東南達潁州入沙河

茨河在蒙城縣南五十里源自潁上諸湖迴繞邑  
境東注於淮

陶中湖在府治西百一十五里界太和縣一作陶  
種潤溉土田居民利之

白楊湖在府治西百二十里界太和縣一作白洋  
西湖在府治西北二里潁河合諸水匯流處宋晏  
殊歐陽修蘓軾為守皆嘗宴賞於此詩酒山水之  
樂論者與杭之西湖并稱云

國朝計東重復西湖碑記

理學文章二者未分之時其  
人莫盛於鄒魯之間其既分

之後而復並盛於一時則理學莫盛於伊洛文章  
莫盛於汝潁何以明其然也理學之久晦而得周  
程文章之久晦而得歐蘓其時同也周程同時有  
張有邵繼起有游楊有謝尹而歐蘓同時有曾有  
老蘓小蘓繼起有黃有邵張有陳秦李其人同也  
且二者倡導之功二程與歐蘓最著程則歸老於

伊而授徒於洛歐蘓則先後官穎陳張繼之小蘓與秦亦至焉其既也歐陽老於穎二蘇家於汝且穎水入洛而近汝水合穎而長故穎尾又稱汝陰地又相同也今人讀伊洛淵源錄者皆知理學之盛昔稱其地為西鄒魯矣及深歷汝穎間攷歐蘓張陳諸先生之遺事故跡然後知文章莫盛於汝穎西湖者穎之北郊歐蘓兩先生與子由無已太虛文潛諸君子先後遊讌賦詩之地也州志載會老堂聚星堂雙柳亭皆在湖旁又其時為畿輔名郡水陸要地湖中蓮芡之實可佐公私水利足灌膏壤兩先生開復經畫具見集中宋紹興後湖漸湮亭堂尤漫滅不可考志稱有四賢祠祀晏呂歐蘓重其為大官也張陳輩自不得祀今其祠亦圯矣康熙七年鐵嶺喻公來守穎思復歐蘓兩先生遺跡再浚西湖廣袤若干丈築隄以固其防置牐以蓄其洩於是荻蒲之所蓄殖鷗鷺之所飛止長

林高柳之所映帶擬之歐蘓張陳之所詠歌駸駸乎欲還舊觀矣復建數楹於會老堂之址高其棖桷美其綽楔既以為登臨憇息之地且以祀前賢而彰遺愛豈不美哉東之至潁也值公經營垂竣新秋佳日友人劉子登招予與諸友置酒湖之湄詣公多稱修復之功而予獨穆然深思歐蘓兩先生暨張陳秦諸公當日觴詠留連之樂諸先生即數百歲後魂魄猶樂此也又追念東年八九歲時先人日督誦歐蘓文章稍長又知讀陳無已張文潛之文愛慕之不敢忘忽忽二十餘年今乃得置身於諸先生仕宦遊讌之地俯仰太息不能自己遂縱思高論著為伊洛理學汝潁文章之說所以誇大乎潁者至矣而西湖與有榮焉雖然亦喻公修復之功不可無記

賽闊湖在潁上縣東南六十里正陽鄉其水與淮

河通

白馬湖在潁上縣正陽鄉湖中有洲上建白馬寺  
陽臺湖在潁上縣北十三里有東西二水物產甚  
多民享其利

白洋湖在太和縣西十五里與府治接一作白楊  
聶家湖在太和縣西北有上中下三湖其中湖即  
蔡家廟湖下湖即柳林湖周迴五十餘里菱芡蒲  
荷水天一色邑之勝覽

駝澗在蒙城縣西四十五里梁大通元年曹仲宗  
伐渦魏遣王元昭等援之前軍至駝澗即此

乾谿在亳州東南七十里城父南左傳云楚子次  
於乾谿即此

白魚港在府治北九十里溝洫之水積流為大渠  
通肥河

汝水在府治南百里舊志云源發汝州天息山流  
至桃花店入府境又東過永安廢縣至朱舉鎮入



淮又沈邱廢縣北有小汝水

附

汝水考

汝河在府城南一百

里自汝寧東北流至桃花店入府界按淮南地形訓云汝出猛山博物志云出燕泉山水經註云出魯陽縣大孟山通志畧云汝水出汝州魯山縣其地與弘農盧氏接界故許慎謂出盧氏也其水南過上蔡至褒信縣汝口南入於淮班云行千三百四十里舊傳謂出汝州天息山者誤也

淮水在府治南百一十里自河南固始縣流入府境又東入霍邱潁上縣界

潁水在府治北源於河南登封縣東流至趙家渡入府境又東過沈邱遶北城門外過潁上之留陵

至正陽鎮入淮謂之潁口一稱沙河

附潁水考

潁州

沙河在城東門外東南流入淮即潁水也按唐要會云元和十一年置淮潁水運楊子等諸縣來自淮陰汴流至壽州西四十里入潁口又汴流至潁州沈邱界五百里至於項城又汴流五百里入於潁河三百里輸於鄧城得米五十萬石考之臨潁志云楮河在縣十五里即潁潁水源出登封縣潁谷經流本縣東南至清水鎮入沙河達於淮鄧城志云潁江渡在縣西一里一百步即沙河也是則沙河即潁水明矣山海經云潁水出少室山黃氏云出河南登封縣陽乾山東南流至潁州潁上縣入淮翰墨全書云淮水東流潁水西北來注之謂之潁口下蔡淮潁之謂也詩地理考云潁水出河南府陽城縣乾山自汝州襄城縣流入潁昌府長社縣自長社縣流入臨潁縣自順昌府汝陰縣流

入潁上縣至壽春府入下蔡縣入淮通志畧云潁水出潁川陽城縣少室山今陽城省入登封矣東南至揚州潁水入焉又東南過南頓潁水入焉又東南至下蔡入淮班云行千五百里河南志云潁水在登封縣西四十里水自石道保神水里入於潁水按郡圖水出登封西南百妃山有故潁陽縣遺址按河南志有少陽河李庄河俱出少室山入潁故山海經通志畧謂出少室也新志謂潁水上通古汴相去遠矣蓋黃河決而入潁非汴水也

豐水在霍邱縣西南十里源出窮谷舊名窮水後改今名

決水在霍邱縣西八十里俗訛呼為史水

渦水在亳州北發源豫之葛河口由鹿邑西來至  
州境與馬尚河合東流經蒙城縣入懷遠界

高陂水在亳州南周四十三里魚蚌菱芡之藪也  
肥水在蒙城縣北三十里源自宿州東流入懷遠  
縣界

金溝在府治北百二十里積畝澮之水通於茨河  
湖溝在蒙城縣東南七十里源自潁州泉流淵渚  
冬夏不涸

畢卓池在府治西銅陽城內池廣十里

聖泉井在蒙城縣西北四十里歲取水禱雨時應

滁州

琅琊山在州南十里唐元和十道志云晉伐吳命

琅琊王伋出滁中駐此王禹偁云元帝以琅琊王

渡江嘗駐此山故溪山皆有琅琊之號山谷深七

八里下有琅琊溪謂之釀泉唐大厯中刺史李幼

卿始鑿石引泉作禪室琴臺賦詩刻石及宋王歐

二守相繼賞詠而名益著有琅琊洞歸雲洞明月

溪紫微白龍六一庶子諸泉其南阜曰雞頭山

附

唐獨孤及琅琊溪述

隴西李幼卿字長夫以右庶子領滁州而滁人之飢者粒

流者召乃至無訟以聽故居多暇日常寄傲此山之下因鑿石引泉醴其流以為溪溪左右建上下坊作禪堂琴臺以環之探異好古故也按圖經晉元帝之居琅琊邸而為鎮東也嘗遊息是山厥跡猶存故長夫溪名曰琅琊日賦八題於岸石乃為狀而述之是歲大厯六年歲次辛亥春三月丙午日述曰自有此山便有此泉不濬不刊幾萬斯年造物遺功若俟後賢天種靈奇公潤色之疏為迴溪削成崇臺山不過十仞意擬衡靈溪不袤數丈趣侔江海知足遂適境不在大怪石皚皚湧湍潺

溪洞壑無底雲興其間仲春氣至萬木華發亘陵  
彼坂吐火噴雪公登山樂樂者畢同無小無大乘  
興從公時公薦觴酒酣氣振溪水為主而身為賓  
舍琴詠歌同風舞雩時時醉歸與夕鳥俱明月滿  
山朱幡徐驅石門松風聲類笙竽嗚呼人實弘道  
物不自美向微羊公遊漢之涘峴山寂寞千祀誰  
紀彼美斯溪維公嗣之念茲疲緊公其記之  
後之聆清風而嘆息者挹我於泉間而已矣

龍蟠山在州南十三里山皆峭壁立石為門上有  
虎跑泉桃花澗偃月洞側多刻名賢題詠

豐山在州西南五里梅贄廟記云山在滁治之西  
南盤亘雄偉出琅琊諸峰上天欲雨則雲氣覆山

巔歲倚以豐故名有漢高祖廟世傳豐沛人嘗居之祠禮甚謹十道志云滁州有豐亭山疑即此山山北有幽谷地窪下四圍皆山昏旭異態歐陽修建豐樂亭於上記所謂其上豐山下則幽谷是也牛頭山在州西四十五里兩峰峻起形如牛頭與障子山相連下為梁村澗

石屋山在州西四十八里牛頭山北上有石屋後有龍竇深十餘丈



曲亭山在州西六十里一名皇甫山按隋志云清流縣南有曲亭山世傳唐皇甫暉禦周師屯兵於此山西北為大山山巔有田七區曰仙人田有洞曰仙人洞

清流山在州西北二十二里舊志云南唐置關地尤險要宋太祖破皇甫暉姚鳳於此又西北有石駝山其上有關曰北關自此而北羣山列峙溪澗環錯為州屏蔽

皇道山在州東北十七里按李漬荇谿記云昔始皇道經是山因名下有秦皇塘

南岡山在全椒縣南二里山勢自西來連亘數十里至此益高聳環縣治為形勝稍西曰黑龍山登山而俯瞰井邑一覽皆盡

九關山括地志云在全椒縣東南二十五里江表傳云項羽兵敗欲東渡烏江道經此山與漢兵一日九戰因名山有礪刀迹

武山在全椒縣東北十里有梁王城及廟疑因梁武得名也又北為焦林山劍舞山

花山在全椒縣西北二十五里攢峰疊嶂如花辦然北界滁州

桑根山在全椒縣西北四十里桑根街在山之麓相連為石樓乳山雙石高峙狀若岑樓背山面溪景物幽邃

馬鞍山在全椒縣西北五十里有人跡及拄杖跡

俱入石寸許有仙人洞由石門緣磴而下深廣數丈有泉乳細滴結為石盤其前十里為龍檜山其右為臥龍山

神山在全椒縣西三十里有神山洞極深廣常燥不濕又西南曰蘓山又西南曰袁子山

北獨山在全椒縣西六十里峰巒特起不與衆山相接上有漢高祖廟及石塔

銅井山在全椒縣西七十里隋地理志梁載言十

道志皆云縣有銅官山上有銅井廣袤數十丈唐以前曾採銅於此久廢有魚出泉中色如金

五湖山在來安縣東北十八里下有五湖因名一名白禪山以山北有白禪村也在縣境為險要由盱眙取道於此

踏青山在來安縣東北六十里昔居民繁盛春日於此為宴遊之地

西龍山在來安縣東二十里與六合東龍山對峙

勢頗高峻上有龍王廟

三山在來安縣東二十里與天長接境山有三峰排列下為孔道

八石山在來安縣西南十三里即淮南八公憩石之處又名八仙山

烏龍山在來安縣西南十八里宋紹興初縣多虎有石尉者立茅司徒廟於此率兵捕逐之害遂除下有黑龍泉出石竇旱潦無盈涸

嘉山在來安縣西四十里上有賜建龍王廟及石刻西北即盱眙縣境

練寺山在來安縣西北二十五里山側有寺東有地名浮林上有浮石高百餘丈

石固山在來安縣北三十五里羣山盤亘惟此山獨高三面險峻登陟者由南阻一徑入宋紹興間居民避寇其上疊石為城遺跡尚存

礬山在來安縣北六十里山中銑鍊成白礬下為

長溝水

馬嶺山在來安縣北九十里來安水出其下

蔣山在州南一里土阜無石高數丈上有蔣帝廟基

滁河在州東南六十里水經注滁水出逡道縣流至全椒石潭與襄水合東南至三汊河會流水經六合瓜埠達於江

清流河在州東二里源出州西清流浦繞州治至



烏衣東與來水合入於滁河

沙河在州北四里一名紅沙澗自來安縣界凡州西北諸山溪之水合焉至州城東達於清流河又有小沙河源出側菱山經州西十里注於石瀨澗澗中有巨石生水底每春夏水漲水石相激澎湃有聲

白茆河在州西北四十里源出清流沛下與瓦店河合至蒲衝與盈福河及來安嘉山河合入清流

河

龍尾河在來安縣東門外源出普潤塘會來安水入水口河

鄮湖在全椒縣西南三十里北魏置鄮縣於此下流通滁河

菱溪在州東七里源出永陽嶺下經皇道山又東南會琅琊溪至沙河注於滁河原名苻溪因避楊行密諱改今名

襄水在全椒縣北境源出石臼山北自賀櫓澗至  
多螺澗凡十六水皆入焉至石潭會於滁河

來安水在來安縣東三里源出馬嶺山東南流至  
來安村又東南入州界會於清流河

栢子潭在州西北隅水深莫測禱雨輒應

西澗在州西俗名烏土河揮麈錄云宋太祖入滁  
以兵浮西澗即此

桃花澗在州南十七里源出龍蟠山麓之虎跑泉

入清流河

虎子澗在全椒縣東北三十五里源出黑石乳入  
滁河世傳劉平為邑長虎南渡由此出境因名

真珠泉在州西三十里側菱山遊者鼓掌泉則濺  
射如珠因名

和州

歷陽山在州西四十里吳志云天璽元年歷陽山  
石文成字謂之石印

白雲山在州西北三十里有石洞名龍泉四時不竭能興雲雨每雲起英英連山故名

九龍山在州西北三十里九峰列嶂中抱大壑如龍蟠又名龍鬬山其前曰闌龍山臨厯湖磊砢峯峙如列崇牙背負九龍山而翼其前故有闌龍之名

雞籠山在州西北四十里州志云下盤綿巒上冠巨石縱裂稜摺狀若蓮花為一州奇勝高數十仞

斲磴絙鐵引以登巔頗視羣山無敢並者杜光庭  
所謂第四十二福地也賀鑄詩注云昔城將淪沒  
神告一姥使西走即携雞籠登此山籠化為石

如方山在州西北六十里舊名六合山梁武帝嘗  
遊此以山形四面方正如金陵之方山故名之西  
嶺巨石巉峙曰獅子巖石潭水碧如染曰金牛井  
烏石山在州西北六十里兩山夾道中多黑石

東華山在州北上有老君臺相傳老子鍊丹處唐

劉禹錫詩有上臺遊柱史句

八公山在州北半里許山僅培塿相對有八仙人  
圍棋會飲於此因名張祁詩云山揖仙風對八公  
蓋一郡勝槩宋開禧中州守周虎於此克敵築京  
觀焉

夾山在州北五十里障空補缺隱如金城實一方  
之厄塞中有夾山關

四潰山在州北七十里又名四馬山項羽既敗垓

下走東城所從惟二十八騎漢兵追者千人乃引  
騎依山為陣羽兵四面馳下潰圍斬將而出以此  
得名又北十里曰陰陵山山小多石相傳即項羽  
失道處上有刺鎗坑遺蹟據漢書九江郡縣有陰  
陵東城今鳳陽定遠縣二城皆在則漢追項羽潰  
圍馳下當在其地今江浦滁和互載按江浦在定  
遠東滁和在南與西壤地相接山川連跨據南畿  
等志云二山在和州北七八十里在江浦西六七



十里而史記正義亦云九鬪山在滁州全椒西北  
皆屬定遠邊界地又按東城漢書音義云縣屬臨  
淮南畿志云烏江漢東城地則羽死烏江即東城  
也陰陵東城舊縣今廢二城之在定遠亦猶襄安  
開成二城之在無為州云爾

赭樂山在州東北五十里一峰亭亭秀出望之可  
愛相近有北大山山勢高聳一名北山

梁山在州南六十里矗立江干與東岸太平府之

博望山對峙如門又謂之天門山亦曰西梁山梁  
王僧辯破侯景將侯子鑒兵陳霸先遣侯安都等  
立柵以備江州刺史侯瑱俱在於此山頂有城王  
玄謨所築六朝建都金陵皆以此為要害之地屯  
兵駐防焉

豐山在州西南三十里崇岡綿阜蜿蜒紆複

含山在縣西三十里山勢雄峻羣山列峙因名縣  
一稱橫山

蒼山在含山縣西南三十里山勢峻拔上有泉曰  
白龍潭傳云昔陳希夷曾隱於此山多產桑一名  
桑山潭側產茶更為佳品

龍洞山在含山縣西南五十里山洞幽深泉流涓  
涓由魯橋澗通桐城牖入江中有小蛇青質赤章  
歲旱取其水禱雨輒應

濡須山在含山西南七十里與巢縣七寶山對峙  
中有石梁最為險阻三國時吳據其東築濡須塢

以拒魏謂之西關魏據其西立關以拒吳謂之東關亦曰魏關

黃稻山在含山縣南十五里西接鹿宕山山半為圓通寺寺門有銀杏二株大數十圍相傳為唐時物

石門山在含山縣南二十里二山并峙石壁峭立如門中有谷道十里通商旅往來

太湖山在含山縣南七十里奇峰十餘削立秀挺

狀若列戟登其巔則大江九華如在几筵也其側有鼓山上有寺舊名大徹禪院康熙四十四年

聖祖仁皇帝勅賜詮真寺三字額

白石山在含山縣南八十里有錢鏗石室俯樓入口約十步乃漸高廣莫測遠近道家謂之第二十一洞天又有二石龍鱗鬣悉具產鍾乳石燕唐開元初賜名曰禱應山舊有白石觀宋白玉蟾嘗遊焉

梅山在含山縣東南五里一名棲隱山舊多梅樹  
相傳曹操行軍指梅林以止衆渴處其相近者為  
龍角山以兩峰尖聳而名

大峴山在含山縣東北十三里一名赤焰山上有  
大峴亭齊末裴叔業叛壽陽蕭懿據大峴拒之

褒禪山在含山縣北十五里舊名華山以唐貞  
觀慧褒禪師得今名上有起雲峰龍洞羅漢洞  
龍女泉白龜泉寺後有石塔石刻二大字宋張

孝祥書又北三里曰華陽山一名蘭陵山前後

有二洞宋王安石遊此有記有喜雨亭遺址附

宋王安石褒禪山記

褒禪山亦謂之華山唐浮圖慧褒始舍於其址而卒葬之以故

其後名之褒禪今所謂慧空禪院者褒之廬冢也距其院東五里所謂華山洞者以其乃華山之陽名之也距洞百餘步有碑仆道其文漫滅獨其爲文猶可識曰花山今言華如華實之華者蓋音謬也其下平曠有泉側出而記遊者甚衆所謂前洞也由山以上五六里有穴窈然深入之寒甚問其深則其好遊者不能窮也謂之後洞予與四人擁火以入之愈深其進愈難而其見愈奇有怠而欲出者曰不出火且盡遂與之俱出蓋予所至比好遊者尚不能十一爲視其左右來而記之者已

少蓋其又深則其至又加少矣方是時予之力尚足以入火尚足以明也既其出則或咎其欲出者而予亦悔其隨之而不得極夫遊之樂也於是乎有嘆焉古人之觀於天地山川草木蟲魚鳥獸往往有得以其求思之深而無不在也夫夷以近則遊者衆險以遠則至者寡而世之奇偉瑰怪非常之觀嘗在於險遠而人之所罕至焉故非有志者不能入也有志矣不隨以止也然力不足者亦不能至也有志與力而又不隨以怠至於幽暗昏惑而無物以相之亦不能至也然力足以至焉於人為可譏而在己為有悔盡吾志也而力不能至者可以無悔矣其孰能譏之乎此予之所得也予於仆碑又以悲夫古書之不存後世之謬其傳而莫能名者何可勝道也哉此所以學者不可以不深思而慎取之也



小峴山在含山縣北二十里一名昭關其西有城  
山兩山峙立為廬濠往來之衝宋紹興間張浚因  
山築城置水櫃以遏敵

仙踪山在含山縣北五十里一名黃山有三百六  
十峰蒼深隱秀為江北諸山之冠互見廬州府

峨眉山在州城西下有連雲觀明嘉靖間改峨眉  
書院

柵江在州西南百五十里與無為州分中流為界

即古濡須口吳魏相持於此宋南渡後置寨

橫江在州東南二十五里南直采石磯漢建安初  
孫策破劉繇將樊能於橫江隋韓擒虎平陳亦自  
橫江宵濟

淞溪河在州西一里源出金泉山縈紆繚繞其流  
雖細而冷然可愛

橫江河在州南一里許經當利驛前入江宋史云  
開寶八年用轉運使李符策發州民鑿橫江河以

通漕運歲久淤塞明正統初知州朱沅濬之復於  
河口開小河出江以便舟楫

太陽河在州南二十里由歷陽湖經戚家橋入於  
江

姥下河在州南三十里由歷陽湖經黃梁橋入於  
江宋乾道初始鑿

牛屯河在州南四十里發源巢湖由桐城牖東流  
至州境入江與南岸牛渚磯相對孫策攻劉繇牛

渚營晉譙王尚之破庾楷於牛渚皆此

裕溪河在州南九十里源出巢湖自無為州流入  
州境東南入於江

石跋河在州東北三十里河開自宋太守胡昉磯  
石上有張果廟石間驢蹟宛然如新跋者命名之  
義本此水由大江支流滙於州東之浮沙河入江  
浮沙河口五里曰鍼魚嘴土產鍼魚他水所無或  
云地本名徵儒以明太祖駐此聘陶安諸儒對面

有思賢港今訛為鍼魚私鹽也

芝蔴河在州東北四十里或云項羽於此止馬名  
止馬河縣志云謂之至馬俗訛為芝蔴又東北十  
里為穴子河

後河在州北七十里發源仙踪山經含山縣入州  
境過六合由瓜埠口入大江

運漕河在含山縣南八十里河南乃無為州地也  
水通巢湖納廬和諸縣之水以達於江侯景之亂

梁王僧辯運次蕪湖景將侯子鑒屯兵梁山以捍  
禦漕運故名今其河實為漕艘運道云

縣河在含山縣南一里一名觀音橋河自縣西北  
諸山澗之水匯流至城西合清江斷澗而流始大  
可通舟又東至和州入大江

澧湖在州西十五里受麻湖水由當利驛港入江  
明永樂中議請置田其利害如歷陽湖

歷陽湖在州西三十里淮南子歷陽之都一夕為

湖唐劉禹錫所謂一夕為湖地千年列郡名是也  
一作麻湖相傳未陷時有老姥先見於夢今湖濱  
有神姥廟永樂中吏目張良興請鑿河營田至景  
泰間始成然地勢平而水難泄每逢雨潦往往多  
淹沒之患

清溪在含山縣西南三十里受三澗水經亞父山  
而南入於江

新裕港在含山縣南八十里港口昔有孝婦居此

名新婦港訛為新裕流合濡須入柵江

濡須水在含山縣西南七十里即濡須山之水會清溪至柵江口同入於大江三國時諸葛恪於此築大隄遏巢湖魏兵至將壞其堤恪率四萬衆破之即此

龍潭在州城牖西方廣數百尺闇黑幽深有漁者網得鐵索至舟滿不絕大駭而止

石牛潭在含山縣南一里潭中有石如牛狀



當利浦在州南十二里東漢劉繇遣其將張英屯當利口以拒袁術即此晉王濬所謂風利不得泊亦此處也

烏江浦在州東四十里即亭長艤舟渡項羽處晉始署為烏江縣今故址尚存

香泉在州北三十五里其水色深碧沸白香氣襲人故名有患瘡疥者浴之即愈名平疴泉梁昭明嘗浴此一名太子湯

馬跑泉在含山縣北十五里即昭關由縣西清江  
斷澗入縣河

三石泉在含山縣鹿宕山三石嶽寄劃然斧劈古  
藤樛木族生其巔石下流泉冬夏不見涸溢

廣德州

橫山在州西五里州志云高出羣山四面望之皆  
橫州之鎮山也巔有龍潭宋天聖中郡守梅詢建  
龍王廟於潭畔山半有攀蘿亭西南麓有張公祠

卷十八  
祀漢人張勃唐天寶中賜名祠山

西嶽山在州西五里俯臨清流環注山足

白茅山在州西四十五里上有朝陽菴梁普通時建有錢佛古井

大首山在州西南八十里山最高峻上有井龜魚時出沒其中相傳遇陰雨隱隱有樂聲

丹井山在州南十里舊志云相傳徐真人於此煉丹丹井尚存

竹山在州南十五里舊志云衆山羅前極松竹泉石之勝絕頂有二亭曰巢雲流玉其相近者有方山山勢紆迴下有方侯祠山口兩峰對峙若二柱然

仙石山在州南二十里州志云山下有石高二丈許坦平可履世傳有仙人獨立於上遺蹟尚存笄山在州南二十里三峰拱峙形如女笄州志云學宮皆挹其秀南畿志云一名雞籠俗稱雞罩

石雲梯山在州南三十里乾溪山西高百餘丈有石階級若雲梯

鷹嘴山在州南三十里州志云其山特峻絕頂一石卓立高十餘丈如鷹嘴下有深窟容百餘人

馬鞍山在州南五十里山周七十里巔有大石如馬鞍

金雞山在州南六十里山巔石洞廣五六尺舊傳晦夜有火光現其中或又見有金雞翔集

靈山在州南七十里中峰有靈山寺上有解慍臺  
山夾水流為珠簾泉丁公潭雲錦泉兩巨石對  
峙名支機石梁橫亘瀑布數十丈垂石下注為一  
州之勝

尖山在州南七十里白石巉巖一峰特起如筆石  
上有水一泓不涸不溢又南十里曰桐山一名白  
石山桐水出焉

乾溪山在州東南三十里山峰卓立天外一溪流

出其下白石鑿鑿以其水常竭也故名又名簾幙山

義蒼山在州東南四十里雲峰環抱碧澗中流竄深奇峻號為義蒼洞天西連石壁山石峭流急義蒼子有絕壁飛湍四大字刻於石

石婦山在州東南五十里峰突起一石高二丈許如婦人藤蘿縈繞如衣獨露其面舊傳有謝氏女介潔有守登山化為石相近有石鼓山巔有巨石

如鼓下有石如架

青山在州東南六十里孤峰峭立圓若青螺相近  
為桃花山山多桃樹唐以此置桃州

五花巖山在州北七十里橫列五峰其峰最高峰  
頂有白佛祠石壁上刻唐天寶年月相近有長樂  
洞洞內廣數丈深不可測其中復多潭洞石乳融  
結千態萬狀又有石鼓以杵擊之有聲有窮其深  
者度險踰關至水深炬滅而止



巖頭山在州西北四十里兩山屹立如關中夾一溪州之水悉滙此入建平

鎮山在建平縣南五里邑之案山也森布羅列若樹屏翰

大巖山在建平縣南七十里巖石崔嵬峰巒層出有池冬夏不竭山下有妙泉

大磊山在建平縣南八十里羣山拱峙一峰特起巔有三石如磊字

鴉山在建平縣南九十里上有一石高二丈許有  
彈蹟百餘俗呼為彈子石又有仙人釣臺宋梅詢  
詩云茶煮鴉山雪滿甌以山產茶曾入貢南接寧  
國界

赤山在建平縣西南七里麓枕大溪

烏雲山在建平縣東北二十五里土人以雲氣占  
雨

鳳棲山在建平縣東北三十里世傳曾有鳳棲其

上

大濤山在建平縣東北三十五里懸崖峻絕松風聲如波濤

伍牙山在建平縣東北四十里輿地廣記云伍員伐楚還吳經此建牙因名舊有子胥廟

大溪山在建平

閩

里桐水所經

金牛嶺在州東北七十里四面重山中一嶺長亘十五里

石佛嶺在建平縣南七十里上有三石高二丈許  
形如佛

峽子嶺在建平縣南八十里與宣城縣接界又青  
苔嶺懸巖千仞其下有清潭

桃姑洞在州東北五十里洞門在半山內數洞相  
通至第七洞頂有一竇日光透映俗呼天井

獨山在建平縣東三十五里與大濤鳳棲二山相  
近

東亭湖在州東三十里一名浴兵池廣五百餘畝  
俗傳張真君餘麵飼魚至今魚腸如麵又有塔湖  
周三里

南碕湖在建平縣南四十里廣德州建平之水滙  
焉北入丹陽湖俗呼南湖九域志作南綺湖

玉溪在州治西門外環遼州城如帶北入碧溪  
大源溪在州西南百里自寧國大陶山經州界流  
入南碕湖

橫梗溪在州南三里滙諸山澗水西北流繞西巘  
山下北流合於玉溪

鯉洪溪在州東南二十里源出石鼓山分二流復  
滙於此而合於桐川

碧溪在州東三十里源出義蒼山西經中丞里波  
瀾滌迴澄澈可愛古木芳洲與溪掩映入畫

郎溪在建平縣治前源出桐汭諸山之水合流而  
滙於南湖

袁邨溪在建平縣南八十里其地產麻甚佳入溪  
漚之則潔白

桐川水在州西北二十五里左傳楚子期伐吳至  
桐汭杜預註云廣德縣有桐水源出白石山西北  
流入丹陽湖即此亦名白石水

白石澗在建平縣東南上接桐川下合郎溪

馬履澗在建平縣東北三十五里俗傳伍員伐楚  
經此馬踐而水湧因名

不老泉在州南四十里大旱不竭有古碑刻泉名  
於上

沸泉在建平縣東十里水味甘美冬溫夏涼

白馬聖井在州東六十里石潭方如井冬夏不竭  
郭母古井在建平縣西南三十里俗傳仙人以藥  
投井水變為醴者即此

六安州

番山在州南十里山非高聳而蜿蜒磅礴為州之



鎮

小霍山在州南五十里一名青山以遠連霍岳之脈故名

大同山 小同山皆在州南五十里山勢峻削僅通樵徑兩山相似故云有蝙蝠巖內深不測昔人避兵於此

團山在州南七十里下臨渾河蒼翠孤特

董靖原山在州南百二十里從石徑轉入原勢平

敬宋里民董靖避兵處

九公山在州西南六十里山有九石狀如人隋志云開化縣有九公山元末鄉人避兵於此寨址尚存其西有松林巖亦名嵩寮巖最深秀產蘭

齊頭山在州西南七十里高千八百丈層巒疊翠頂正方平山麓有水晶菴石泉井雷公洞魁星崖諸勝蹟巔有寶誌公道場相傳為寶誌說法之所障山在州西南二百四十里形如屏障故名其相

金華山志卷十八  
近有帽頂山界河南商城縣

武陟山在州西三十里相傳漢武帝南巡登陟於此故名宋州人焦炳焦煥讀書其上

響山在州西九十里其中空洞鏜鏜有聲相傳四時皆響有一老僧趺坐其門山忽無聲僧去後山響如故

寨基山在州西百三十里山極高峻產茶香味異常品有泉出石竇甚甘向東巉石相距如門一夫

可守昔人結寨避亂今為寺

蓮花山在州西百五十里有二山東西對峙產石蓮花

獨山在州西七十里地平曠一峰獨峙舊有武皇祠祀楊行密今為寺梁淮南招討使王景仁攻廬壽曾戰此

祖家山在州西南百二十里世傳宋紹興間有祖興氏禮義傳家世居於此又西南二十里有山高

九百丈林木茂密宋文風氏居之上有砦名文家山

龍穴山在州東四十里上有龍穴其水張又新品為天下第十泉即歐陽集古錄所謂張路斯鄭祥遠二龍君戰處宋汪立信讀書於此其地今建廣福寺

九龍山在英山縣東八里舊志云山半有雨淋崖  
禱雨立注又縣東二十里有廣福山

英山在英山縣東五十里舊志云山高峰秀為羣  
山冠縣以此名上有井出雲則其年必豐下有漢  
英布墓

雞鳴山在英山縣北二里亦名鷹山宋淳祐中制  
置使吳淵於此立砦

得勝山在英山縣西門外舊志云明洪武中邑令  
禦寇於此有功故名向有砦

天人山在英山縣西七十里險峻有天人砦

多雲山在英山縣西百里接羅田界舊志云上有  
九井上三井人不能到中三井祈雨每驗下三井  
有風井誤祈此井則狂風震地井中嘗出雲氣蔽  
虧日月為縣境諸山之最險者其西有岐嶺通湖  
廣之蘄水

羊角山在英山縣北四十里絕頂有石嵯峨如羊  
角舊傳老子降神於此

石人山在英山縣東北七十里第一峰有石如人

立崖下有洞又縣東北九十里有紫臺山一百里有大陂山

霍山在霍山縣西北五里縣以此名一名衡山亦名南嶽又名天柱山漢武帝南巡以衡山遠阻移祭於此以代衡嶽其峰聳秀儼若飛鸞頂有龍湫天池風洞嶽井試心崖凌霄樹又有淥水池旱澇

如一餘詳見安慶府

附

唐皮日休霍山賦

臣日休以文為

命士所至州縣山川未嘗不求風謠以頌其文幸上發輜軒使得採以聞六年至壽之駢邑曰



霍山山故嶽也邑贅於址至之二日離邑一舍望乎嶽將頌之文也及見之則目乎轡手乎輶心乎疎神乎翫始欲狂其文寫其狀如丹青之不差也頌其風文其謠如金石之永播也既而其精怯然搏敵躁然戒囚紛然棼絲怵然墮空浩然涉溟幽然久疾則知才智之劣如老而加疾將杖而奔者於戲霍山之靈哉霍山之靈哉將闕於神而愚之耶抑有所達而託之耶其辰既決其精忽淪怯然而勝躁然而適紛然而靜怵然而安浩然而濟幽然而愈如壯而能決將陣而能敵者於是狂其文寫其狀辭曰太始之氣有清有濁結濁為山峻清為嶽其山厥臣其嶽為君惟南之鎮曰霍為尊嶽之大與地角壯與天劼勢荆豫華嵩青沂充岱如垤而秀如塊而銳嶽之高千仞萬仞蒼蒼茫茫日月相避其光望之數百里外為天棟梁嶽之尊端然御

極竦然正位靜然而聽凝然而視其體當中如君  
之發其屬者如駢其拇如枝其指若卑其儀若肅  
其位嶽之氣其秀為春其清為秋其翠如雲雲不  
能麗其色如烟烟不能鮮若雨收氣爽丹青滿天  
嶽之靈其神不昧其報如簪若雨用淫嶽能朗之  
若歲用旱嶽能澤之嶽之德生之育之煦之和之  
開闢染草淒淒迷迷藻績數百里嶽之形有雲驚  
其勃如怒有象烈烈其來如決叱豐隆奔列缺轟  
然霹靂天地俱裂嶽之異狀其勢如危或不可支  
若不可離或仰而頤有如屹空或俯而拔有如攫  
地其曉而東有如貫日其暮而西有如孕月有水  
如脈有石如骨有洞如腹有崿如節或銳而勵或  
斷而截或迴而馳或低而折其經之怪之詳之詭  
之千種萬類繁不可得而詳記因神狂不能自主  
也乃寐夢一人絳衣朱冠貌魁形曰余祝融之  
相也夫霍山君之故治也爾賦之誠形矣勝矣怪

矣與矣然義有不傳帝俾余蒞夫古有五嶽霍居其一所以五嶽相通者唐虞之世五載一巡狩一載而徧上以觀侯下以存民侯有治者涉不治者無民有寬者平窮者濟泊唐虞以降皆燔柴於霍我帝用饗其禮至周且冊而命我與諸玆星列中同日漢之後乃異我號而歸於衡故祀融還都余守霍今聖天子越唐邁虞而廢巡罷狩余之封內有可然可陟可平可濟者是聖天子無由知之爾能以文請執事之達者易衡之號以歸於我請天子復唐虞巡陟之義故爾之將賦余閑遇爾懷而不爾文帝曰有衡既遠有狩必勞惟霍之通斯號可復觀者有能言胡不俾帝命余錫爾文爾無忘也臣曰請惟神命既登而書焉呼異哉

烏梅尖山在霍山縣西北二十里兩峰多產梅北

峰下有雷公洞作霧即雨有雷公斧蹟產茗絕佳  
馬鞍山在霍山縣西四十里峰巒奇秀為諸山最  
三廻山在霍山縣西南二十里又名三曲山中有  
小港縈廻三折山勢隨之東北通梅子嶺多產梅  
四十八盤山在霍山縣西南百二十里山徑曲折  
行旅負荷者必以杖支擔息肩然後進凡四十有  
八盤

白石山在霍山縣南五十里山皆白石上有摩旗

尖又南十里有四望山宜於遠眺

東石門山在霍山縣東十里與西石門相對中有  
狹徑如門

復覽山在霍山縣東二十里相傳漢武帝南巡還  
復登此顧瞻天柱因名

指封山在霍山縣東三十里相傳漢武帝南巡見  
其峰巒峻拔乃指而封之為霍嶽副

通光山在霍山縣東北十里山有石竅通光如月

聖人山在霍山縣東北十里石壁奇峭勢如欲壓壁間有巨人掌蹟隋志云廬江縣有聖山即此

灊臺山在霍山縣治威遠門外五里其山純石旁鐫小赤壁三字陳霆灊臺詩云秋風黃葉灊臺寺匹馬來遊正夕陽即此

雪峰嶺在州南七十里石上鑿佛像以千計中峰禪師之舊迹也

古路嶺在州西百五十里盤回三十七折始至其

上

遮日嶺在州西百八十里山高徑深亭午方見日影

韓婆嶺在州西二百里界商城又西二十里有清風嶺界霍邱

楮皮嶺在霍山縣東南四十里居人於此造紙

香爐崖在英山縣西五里舊志云有仙蹟亦有龍井祈雨輒應

雕翎崖在霍山縣西南百五十里臨河壁立

八仙巖在州南六十里石壁相向其洞有八

元龜峽在霍山縣西三十里世傳大禹所鑿

雷鳴洞在州南百二十里中虛能應雷鳴居人以

此候雨

龍潭洞在英山縣東二十里舊志云其洞深邃懸

泉下滴竅石如盂

嶮石在英山縣南六十里三縣水口有巨石橫截



於河以故邑中不通舟楫

龍爪石在州城西臨水上鐫龍爪二字其大如斗  
渾河一名白沙河在州西漢書謂之泚水源出霍  
山經州界北流經霍邱壽州入淮唐書云朱全忠  
伐楊行密戰於渾水為行密將朱瑾所敗即此  
溶水河在州西七十里源出齊頭山西北流入河  
南固始縣界合於史河

青龍河在州西百三十里與三元幢河同入渾水

以達於淮

青石河在州西南七十里出紅石崖會於淖水

馬柵河在州東南八十里流經舒城縣之桃城入  
巢湖

雞兒河在英山縣南五十里發源瓦寺前通嶮流  
至蘄水入江

英山河在英山縣西源有二東曰東砭西曰西砭  
皆南流至縣西南二里合流

三灣河在霍山縣南三十里源出鬲山入於化龍河

漫水河在霍山縣西南百一十里源出英山縣界東北流至縣西南三十里為梅家渡又東北入於淠河距漫水十五里為陡山河源出分水嶺亦東北流入淠水

化龍河在霍山縣北門外合流於黑石渡入淠河烏龍潭在州西百三十里歲旱取水禱雨輒應

泗州

甌山在州西四十里下有甌山湖南通淮一作碧  
山州志云以土色碧故名

巉石山在州西百二十里淮水北岸與南岸浮山  
相對即梁天監中築堰處也又西有車門有路通  
車

九山在州西北八十里以有九岡而名北接懷遠  
之塗山

第一山在盱眙縣治東宋自京師至汴口并無山  
惟隔淮有此故名有米芾書第一山三大字勒於  
石又縣治南有清風山皆名勝處

臺子山在盱眙縣東一里劉宋臧質守盱眙以拒  
魏師魏造弩臺射城中即此

盱眙山在盱眙縣東四十里舊以形似名馬鞍山  
唐天寶中改今名

東山在盱眙縣東南三里有石洞左曰靈關右

曰劍壁洞中曲折相通窅非凡境

都梁山在盱眙縣東南五十里山多蘭草俗謂蘭  
為都梁故名方輿勝覽云隋於此建都梁宮有磬  
泉釣魚臺

雲山在盱眙縣東南七十里一名東陽山山有龍  
潭仙人洞其麓有寺蓋舊東陽縣之佳勝也

九頭山在盱眙縣南三十里又名塘山岡阜重疊  
溪澗縈紆亘四十里

上龜山在盱眙縣西南一里舊志云舊有八仙觀及招隱洞洞口有招隱亭又二里曰寶積山山麓有石刻道德二大字又有羅漢泉

清平山在盱眙縣西南八十五里郡邑志謂之青山方輿勝覽云清作青宋紹興間劉澤保聚於此嘉定末武統制亦據此山城門街道池井猶存

紫陽山在盱眙縣西南百里縣志云上有古浮圖山麓有古淨明寺相傳唐人常於此鑄劍有試劍

石磨劍池一名九乳山

嘉山在盱眙縣西南百五十里相傳宋將孟良於此立寨遺蹟尚存上有龍王廟禱雨輒應

三臺山在盱眙縣西南百五十里上有三峯鼎立如品字其上平衍可屯十萬衆宋建炎間劉綱保聚於此綱劉位之子也

玉環山在盱眙縣西八十里狀如玉環一名女山上  
上有二女廟



西廟山在盱眙縣西七十里有九江王英布廟縣東南又有東廟山

浮山在盱眙縣西四十里北臨淮水故名亦名臨淮山寰宇記云在濠州東九十五里俯臨長淮山下有穴淮水汎溢其穴即高水減即低濠梁志云浮山洞夏潦不能沒而冬不加高故人疑其浮也舊傳洞有仙人寓焉南史云梁天監中曾築堰於此以灌壽陽功成旋決上有靈巖寺名人題詠

甚多五河志云是山雖在盱眙去五河尤近關鎖  
風氣捍塞水門實五河之屏障盱眙不得而專也  
天長亦有浮山

陡山在盱眙縣東北五里俯瞰淮河其勢陡峻一  
名斗山

軍山在盱眙縣東北六里三國志云魏鄧艾嘗屯  
軍於此築堰溉田亦名君山又東北一里曰長圍  
山舊志云魏大武圍盱眙自都梁築長圍圍城造

浮橋於君山截水路即此

下邳山在盱眙縣東北三十里上有絕壁下有重  
淵嶽讀經云禹治水獲淮渦水神巫支祁形猶獼  
猴力踰九象鎖於龜山之足淮水乃安焦山說枯  
亦云唐永泰中李湯以牛五十引鎖出之鎖末有  
一青猿高丈許復拽牛沒水蘓軾詩云清淮濁汴  
爭強健龜山下瞰支祁宮古寺後有井俗傳鎖支  
祁於井中

冶山在天長縣南四十五里產紅石舊志云吳王  
濞卽山鑄兵因名上有天井白龍池鐵牛洞真珠  
泉諸勝又南十里曰道人山

覆釜山在天長縣西五十里產石黑而礪舊志云  
周世宗征淮南嘗駐蹕焉

橫山在天長縣東南五十里望之若橫故名上有  
泉不竭山南有踟躕山相傳陳荀朗破郭元建地  
胭脂山在天長縣舊城西北隅厥有高阜日光掩

映赤色殷然宋包拯改名紅山今呼為胭脂云

金岡山在五河縣南二里土色純黃故名

九岡在五河縣南三里崇岡綿亘起伏凡九

臥龍岡在五河縣西南七里下有龍潭

瑞巖在盱眙縣西北下有泉源巖上鐫瑞巖泉篆  
書

秀巖在盱眙縣玻璃泉上有石刻字并唐宋人題

詠

繡谷在盱眙縣普濟院南石林蒼蔚繁花縟卉春  
如錦繡

杏花巖在盱眙縣崇福寺後有蔣穎叔陳述古題  
名

溧河在州北七十里源自虹縣下流通塔影湖

直河在州東北二十里宋崇寧三年開此由汴河  
達於淮又州東門外有一字河隋時所開通直河  
口入淮者以河形直如一字故名

紅藍河在州東十里南流入淮隋宮人種紅藍於此

池河在盱眙縣西自定遠縣界流入此注於淮

運河在盱眙縣東北三十里龜山鎮一名新河宋史云熙寧四年發運副使史公弼所開以避淮流之險其後蔣之奇復濬治之

秦蘭河在天長縣東四十里源出橫山流入於毘沙湖

汭澗河在天長縣西四十五里受覆釜山西南諸水三汭合流入丁溪湖又縣東北有龍岡河西北有銅城河俱入於丁溪

石梁河在天長縣西北三十里自縣以西之水皆入焉南有石梁見通典今廢

得勝河在天長縣北七里相傳漢高祖自將擊英布得勝於此因名

潼河在五河縣治東三十里源自虹縣通沱河經



天井湖南至鐵鎖嶺入淮

滌河在五河縣南二里源出南湖東流入淮

澮河在靈璧縣流至五河縣南入於淮

沱河在靈璧縣流至五河縣西北合澮水東入於淮

五河口在五河縣東二里乃澮沱潼滌四水入淮處

峰山湖在州西百一十里通淮

塔影湖在州西北四十里湖東有龜山寺塔日照  
塔影入湖故名廣袤數十里通洪澤湖

永泰湖在州北湖周三百餘里出朱衣鮒

洪澤湖在州東北闊百二十里會諸湖水而通於  
淮即今州城之所陷也縣志云舊名破釜澗隋煬  
帝幸江都時嘗遊此又見淮安府

龜山湖在州東北三十里與盱眙下龜山對岸  
安湖在州東北六十里下流入淮西有嶠墩湖

萬歲湖在盱眙縣西二里周世宗伐南唐曾駐蹕焉一名西湖

三城湖在盱眙縣西通池河入淮

丁溪湖在天長縣東下流為五湖入高郵州又有萬壽湖感塘湖沂湖上白湖俱與此通

五湖在天長縣東北四十五里五水相合為一東接高郵州之毘沙湖

南湖在五河縣南七里流為濞河

天井湖在五河縣東北二十里與州治界

淮水在州南一里西自臨淮入五河縣流經盱眙抵州城之南會諸湖水東北入山陽桃源界

汴水在州北西北自虹縣流至州界入淮宋蘓軾云自唐以前汴泗會於彭城之北然後東南入淮近歲汴水直達於淮不復入泗矣蓋自隋開通濟渠始也唐宋之世汴水皆為漕渠云

龍潭在五河縣西南七里相傳有龍潛於中

長沙洲在盱眙縣北淮水泛漲賴以捍禦蘓軾詩  
云十里清淮口長堤轉雪龍是也今廢

玻璃泉在盱眙縣瑞巖之下泉水清冽瑩徹如玻  
璃米芾詩鑿破玻璃引碧泉

大沱溝 小沱溝俱在州北十三里流入於汴

江南通志卷十八